

AHEPERI, EKAPIITULU YA NEETHANU NA MOSA ³

 Mooxeleliwa, apathhani. Ereerelo okhala va. Ni—ni omaliherya epacerelo ela yuulupale ya pastore ahu tthiri yaamukuxa ekumi y'ekkekhai, kхиyaarowa? Tivo ninnaavuwiha Apwiya mwaha wa owerya Waya wothene wuulupale woopenuxa ni omoriwa Waya ikarari Awo annivahaaya moovirani mwa miyaakha.

Vano kookhalana mihipi kamosa-kamosa wira kihimye. Mmosa, hiyo, Munna Wood ni Munna Roberson, ni ninthuna nooxukhuruni nyuwo othene mwaha wo onivekelela, mwaha wa mukwaha wooreera. Naahikhala okathi wooreera; naakhumme paahi mahiku maxexe ni nuusu, kookupali, nto nooththika-tho ni vooreera. Apwiya aanireeriha.

⁵⁰⁶ Vano, hiyo nnihimya wira Munna Graham Snelling, muhakalaliho awe, nlelo onimwiiraneya, iwe wo—wookiseryani wa Ephiro Brigham, o...opooma nno. Nto Namamaru ila enrwa ohiyu... Kintthuna kikhume meelo, numual muteko wo onvitha mutthu kinrowaaka omuhimya muhina mwa okathi vakhani. Nnimooleelani Namamaru ohiyu. Hiyo ninthuna nirove ntoko alipa-oorummwa, othene, wira namuthotole Munna Graham ohinathhi omaliha muteko awe iwe. Ni ninrowa ophavela okhalicha ekereja yothene vamosa, nawerya vale, ni orowa ntoko alipa-oorummwa wira nathukumane, nakhale ni Munna Graham mwa mmosa wa miteko sawe.

⁵⁰⁷ Nto, vano, oxekuw'ola o—ompani wa alipa a miteko s'ovitha oCharlestown, ori mu—Muhan Colvin, yoowo aatonko orwa okereja va miyaakha sinci-ene sivinre, a miyaakha miloko mithanu na mili ni mixexe, ohin'ye ekumi ila nsana wira orowe akhale n'Apwiya Yesu. Nto ovithiwa wawe onrowa olaleya Sekunta, Reverendu Mwenye McKinney, yoowo khalayi, aari, pastore a ekereja Metotista o—oPort Fulton miyaakha sinci-ene, yoowo aari mpatthani aya oomeekha. Nto miyo kinrowa omukhaliherya, Sekunta, kookupali, ewoora emosa ni minuutu miloko miraru, o—okapela ya oCharlestown, Indiana. Ni nyuwo othene apathhani a emusi Colvin mwaamuxukhurela, koosuwela, vano elipiheryo yaamukhaani paahi wala o... ovahana ntata vakhani. Tthiri hiyo othene noosuwela exeeni iyo, hiyo nitonko ovira mmakhuwani, mmo, yoohi, ni ninnisuwela etthu enihimya opweteiwa mpatthani. Nto siiso hiyo... Owo ori muka—mukapelani vano, oCharlestown, Indiana. Nyuwo mwarowaru oxekow'ola, vano, yaamukhala yooxukhureliwa ni

emusi Colvin, kookupali. Atthu aya anci-ene hata annoorwa va otapernakulu. Miyo kihaatheliha, waavitha, waapatisa, ntoko, amusi aya, othene. Nto Mwenye Grayson, yoowo aari namwaattamanani ahu nno, ti mulipa a miteko soovitha iwe.

⁵⁰⁸ Vano nto ela, ohiy'ula, Apwiya yatthuna vale, vaavo vanihiyereryaahu voosiis'ula, ninrowa weehererya otthikela olelo ohiyu, mwa osoma nno wuulupale hiyo onsomaahu vano. Vano nto kinoona wira iyo ti saari mihupi, mpakha—mpakha miyo—miyo vansuwelaaka. Nto Namamararu ila enrwa ohiyu, vano, hiyo ninoohimya ohiyu onrowaahu okhala ni Munna Graham.

⁵⁰⁹ Ni ninniwaakhela orwa vooreera aletto othene mmikhorani mwahu. Ni nootteeliwa murima okhala ni nyuwo va voosiis'ula, ni ninvekela wira Muluku ooreeriheni, vanci-enexa, voowaatta olelo mwaha w'othukumana nno.

⁵¹⁰ Munna Cox onoomalaru okileela wira ikaruma sooruma khisaavara muteko oratteenexa okathi uwo. Eyo alakela, khino mwaha wa okathi, enaanelo yoowaatta mukarumani sooruma vo. Ni iyo khasihyo soolokaxa, opacerya wene, tivo owo pooti okhanle-ene ti mulattu.

⁵¹¹ Kinnimoona munna mmosa muthiyana okilaanthe va kinimusuwel'aka, Munna Arganbright, miyo...Ela khekhanle saana ni—ni yooreerela, ovekela yeela, masi moomwiiwa Munna Arganbright okhuma okathi ophin'ye-awe weiwo? Miyo nkireere ocaliwa omwiiwa yoowo niweryakaru. Owo ori oSuwiisa ni wAlemaanya, vamuthukumanoni weiwo ni Munna Tommy Hicks ni Paul Cain. Nyuwo mwaphiyerya-ru wiiwa, Munna Ruth, mukileele naanaanoru, vowaakuvaxa ntoko sinwery'anyu.

⁵¹² Vano, etapernakulu yaamukhaani kherina omempuru, masi hiyo nrina opatthana. Hiyo khanrina hata eyaaminelo woohikhala Kristu, hata ekano woohikhala ophenta, hata eliivuru woohikhala Bibilia. Eyo ti Eliivuru emosa paahi hiyo ensuwel'ahu, ni ethtu emosa paahi hiyo ensuwel'ahu, ntoko sirin'ahu. Okathi Ephome ya Yesu Kristu ennirapihaaya itampi sothene, hiyo ninnikhala opatthana mmosa ni mukhw'awe, atthu othene.

⁵¹³ Miyo kaanweha, voosiisu'ula, akina a nyuwo atthu khino moomwiiwa munna avekelaka. Owo aari muKatolika, vano, wala muKatolika a khalayi. Nto hiyo nookhalana inamuna sothene soovirikana s'atthu anrwa va. Kaahikhala mureerelo, okathi vakhani ovinre, wira kivahane ntata ni munna Mmenoniita okilaanthe va. Ni okhuma aMenoniita, okhuma aMetotista, okhuma aPatista, ni aKatolika, wala ole ontthuna, arweeke. Nto hiyo ninnipatthana vamosa mwa iparakha sa Masu a Muluku. Va aakhala Anamoonaa a Yehova ni inamuna soohiyana-hiyana sa atthu, vano, a miromolelo soohiyana-hiyana.

⁵¹⁴ Miyo yaanikisivela (ahe, nlelo ennikisivela) Onikela nsuwa. Miyo okisivela ikhavaloo ni inama. Miyo kileliwe omatta paahi, nto miyo—miyo okisivela. Nto hiyo naanithukumanyaka, ni miyo kaanirowaka ni yaawo. Ni naahikhala mukuso woweettiheya. Nkisuwenle sinto nyuwo atthu a Onikhuma nsuwa munnisuwela ole okhanle mukuso woweettiheya, wala nnari. Okathi onkelihaaanyu inama mu—mutakhwani, aakhalana mukuso wira okhottiherye iyo weetta pure-pure, yeeyo yiihaniwa, otthikela mmatta. Iyo saamulya malaxi, vatthu awo anaalaaya malaxi a eyiita. Nto osulu mmwaakoni, awo nave aakhalana mikuso sooweettiheya, mwemmo awo anvalaanyaaya soothiyana ni soolopwana, ni siiso. Oniihaniwa mukuso woweettiheya. Masi mukuso muulupale woweettiheya ti nipuro mulipa-oosuka oneemelaawe-vo okathi inama sinviraaya.

⁵¹⁵ Nto vano miyo kookilaathi iwe, mahiku manci-ene, vakhukuluni vaka va ekhavaloo, ni oweha okathi inama saaviraaya. Saahikhala inamuna sothene sa maarakha oovirikana saakela. Saahikhala kamosa-kamosa saaihaniwa "Tiyanante." Ni sikina saya saaihaniwa "Bar X." Ni sikina... Sawihu saari "Tripod," yoolattana ni ekanyeryo ya Mulipa-oohotta. Woottharelana, ohitto waya, aari "Nipita na Mpiiru," vakhavaloni. Ni iyo saahikhala mithinto sothene sa maarakha, wira—wira esuweleke inama saya okathi yaakumihaaya.

⁵¹⁶ Vano, mulipa-oosuka khaari oocalaxiwa ni maarakha xeeni awo yaarinaaya, masi t'ila, mulipa-oosuka aacaliwa ni oweha ekanyeryo mmaaruni mwaya. Itthu sothene saakela mmwe, hata wira yaari maarakha xeeni, waahaana okhala Hereford a ephome yooloka. Khiyaakkhanle okelaka mmwe ehikhanle wira yaari Hereford. Naahaana okhala nikoto noolempwa ahioso khinaavira.

⁵¹⁷ Miyo kinnuuupuwela, nihiku nle okathi Apwiya anrwaaya, Awo khanrowa ocaliwa ni maarakha xeeni ninwaraahu, masi vakhala wira hiyo outhene n'aKristu ooyariwa vasya. Ti yeeyo. Nlo ti nikoto na Kristu. Omwaleiwa wa Ephome onoorowa onooniherya, hiyo outhene n'aKristu. Nto vakhala wira ninrowa okhala siiso *iwe*, vanreerela nikhale siiso nno. Nyuwo khamunuupuwela siiso? Ti siiso, hiyo ninnixukhurela opatthana wothene wa ikereja sothene soohiyana-hiyana.

⁵¹⁸ Vano ninsoma Eliivuru ila yooreerihiwa y'aHeperi. Munna mmosa khereere omusivela eyo vanci-ene mpakha owo okunxaawe ifiita ni ompaka eliivuru ya elaleyelo mwaha wa yeela.

⁵¹⁹ Vano ninrowa okela, naanaanoxa, kapiitulu 11. Ninwehererya oviriha okathi w'eyiita mwa yeeyo, kapiitulu 11. Maana naatthuna naatthikele, khula mmosa a atthu awo Muliivuruni ni otthavaniha Yoolempwa yothene vamosa. Miyo kaarowa wira yeeyo. Miyo kiniira mwa epantte, mwa seiya, sa

ikapiitulu iya sivinre, wira kiluttanihe Eliivuru yothene. Maana, moone, Soolempwa sihaana wooniherya Soolempwa.

⁵²⁰ Tivo, yaakhanle-ene evirikanelo, mutthu aarowaawe wuupuwela wira Soolempwa sinnivirkanya emosa ni ekina, eyo yoovonyeya. Khiivo hata Yoolempwa envirikanya Yoolempwa. E—evirikanyo eri nipuro khino Eyo envirikanyaaya enamuna ahu yo woona Yeeyo, masi Eyo kheniivirkanya Mmansaya. Miyo kinnikhala mmutekoni, sinnivira miyaakha miloko miili ni mithanu na mosa vano, ni nkinatoko, emaara emosa, ophwanya ethtu emosa mBibiliani envirikanya ethtu ekina elempwe mBibiliani. Ni miyo—miyo koosuwela wira khekhanle mmwe.

⁵²¹ Nto olelo ninsoma emosa wa ikapiitulu sooreerihwaxa ya aHeperi, kapiitulu 7. Ni akhala mutthu ohirina Bibilia, aatthuna onitthara nisomaka, naamutteeliwa murima wooruuhelani Bibilia mwavenxa-ru ntata nanyu paahi. Kinimwaaleela amosa-amosa wa ahumu, mutthu, arwe va yaakuxe kamosa-kamosa. Aakhala anvenxa matata aya ottuli iwe. Ni kooxukhuru, munna. Nto nyuwo mwamutthuna Bibilia, nvenxe ntata nanyu paahi, nto awo animooruuhelani.

⁵²² Vano, enamuna emosa paahi ekereja ekhanlyaaya otekiwaka, enamuna emosa paahi mutthu okhanly'awe okhalanaka Waamini, kahi mwaha wa muromolelo awe, kahi ni wiitakanxa wawe. Masi Waamini wawe khonimumula vasulu va teyoloxiya a akhili a mutthu, okhala wira ti, hata ti sayi, eyo enkhuma wa mutthu voomalela. Masi enamuna emosa Waamini onweryaaya ophwanya nipuro naya noomumula na nttittimiho, onkhala vasulu va Masu a Muluku ahinttikinyeya ni ahinrukunuwa. “Waamini onrwa mwaha wo wiiwa, wiiwa Masu.” Ti siiso entthuneyaaya. Ni—ni Waamini waiwiwa ni okupaliwa, ti wookhaliheya voohimala. Khiivo-tho enwerya ottikinya, voohicala exeeeni enrwa wala orowa. Khiivo enwerya okhalakhala erukunxaka Waamini iwo. Nkuupuwelani yeeyo. Nyuwo moolipihiwa ni nankura, ni nyuwo khamunrukunuwa-tho, wa okathi ni Ehimalelo. Nyuwo moolipa ni nankura mahiku othene, “Maana Muluku, mwaha wa mukuttho mmosa, ohaalokiha voomalela mahiku othene ale ooreerihwa, wala oowiihaniwa.”

⁵²³ Ni Waamini wookhalana nipuro nuulupale mwa muKristu, makhalelo a mulipa-oowaamini, onweryaaya weemela vakhiviru va mahiye a marove wala vasulu va ekaxawu, vaavo ttuutthu ooreeraxa wala mposi oophentiwa ovinryaawe okhuma ekumi ila orowa okhopela. Nto ni oweha woolipa wa niitho na xawawe, onniwerya onweha Ole ohimmye wira, “Miyo ki Ohiimuwa ni Ekumi.” Ni awo anniliyala itthu sivinre. Awo anniilipiha akelaka omukaanonni wo wihaniwa wuulupale.

⁵²⁴ Miyo kinnitteeliwa murima Muluku ovahenry'awe ethu iyo, ni ookhalika yoovaha ya mahala wa othene. Ti yeyo entthuneya ikereja okhala. *Ikereja* khenihimya miromolelo wala mitthenkeso; enihimya wira, "Makhuru a atthu, a alipa-oowaamini, athukumanne vamosa vathi va opatthana wa Masu."

⁵²⁵ Ni mwa mwiixitthiyo yoola wooreeraxa va wa Paulo Oowaarya, va milipiheryo, mukapiituluni sivinre, owo onnikhalaka vanci-enexa ohimyaka mwaha wa oMuluku wuulupale wa Pwiya Yesu ni Ole Owo aaryaaawe. Kristu aari Muluku, aaipanke siiso wira atthu ewerye omoona ni omukwannya Yoowo, ni-ni opatthana ni Yoowo. Kristu, Pwiya Yesu, aari erutthu Muluku aakhalaawe-mo, "Muluku aaipanke erutthu khukhala ni hiyo." Timoteyo Oopacerya 3:16, "Vekeekhayi esiiri yuulupale na nttittimiho, wira Muluku ohiisooniherya ntoko mutthu."

⁵²⁶ Yehova muulupale aahikhuruwa khwiikhaliha ookwannyeya, ni okhalaka mw'erutthuni ya Mwan'Awe, ohimyaka ni aataanihaka olumwenku ni Yoowo. Muluku khaari hat'etthu...Kristu khaari hat'etthu woohikhala Muluku, ni-ni Muluku khaari hat'etthu woohikhala Kristu. Awo aili vamosa yaapaka oMuluku mw'erutthuni, ookhalihawa mukhaani ovikana Malaikha, wira Owo awerye ohaawa. Malaikha khanwerya ohaawa. Yesu aari Empa Muluku aakhalaawe-mo.

⁵²⁷ Bibilia oohimya, kapiitulu 7 ya Miteko s'Arummwa, wira, "Ipa, ni soopahiwa-...mukuttho ni soovahiwa soopahiwa Nyuwo khamutthunne, masi erutthu Nyuwo mookuupela Miyo. Masi Ole a Wirimu khonikhala ipa sootekiwa ni matata, masi erutthu Nyuwo mookuupela Miyo," wira okhalaka mpa wala okhala moopatthanani ni mutthu.

⁵²⁸ Muluku atthuniherya, naanaanoru nimalihaka-ru kapiitulu ela va, ahiiso Eliivuru ila, nintthuna nitthikele ottuli ni nikuxe Eliivuru ya Ruthi ni wooniherya mmo moota Muluku aakhanly'awe mmusi wa hiyo, wira owaataanihe ale yaarimeenle otthikela wa Yoowo opatthanaka ni okhalaka mmosa a hiyo. Nvuluxa ohaana okhala mmusi, ni enamuna emosa paahi Muluku aakhanly'awe okhalaka mmusi wa hiyo, waari okhala mmosa a hiyo. Tivo, Owo khaakhanle ookhalaka Nlaikha ni okhala mmusi a mutthu.

⁵²⁹ Nsana makaaripi okathi waalavulaaka ni mwaana oowiiniwa murima, mwaapara aka, a maama onammala-ru okhwa, khwira, "Oh, Munna Bill, kinoona wira awo aNlaikha ohiy'ula."

⁵³⁰ Miyo khwira, "Nnari, Earl. Awo khankhalakhala ekhalaka Nlaikha. Awo muthiyana, ohiy'ula, siiso ntoko Muluku saapanke-awe, ni kweekwe anookhala, kahi hata Nlaikha." Muluku oopaka Malaikha. Owo khonaapakeke atthu okhala Malaikha. Owo opanke Malaikha *ni* atthu. Tivo atthu khankhala

Malaikha, ni Malaikha khanrowa okhala atthu. Muluku aapanke oovirikana.

⁵³¹ Vano, ni mwa Kristu khwiipaka erutthu wira ovuluxe okhuma erakamelo ele yuulupale mutthu aamonre-awe, ni ehikhwelo ele yaahikhuruwa mwaha wa etampi, Muluku aahikhuruwa khukuxa mukhalelo wa epakeliwo ya mutthu, ni khukhala mmusi ahu, wira Owo awerye okuxa itampi sahu ni okhwa wahu.

⁵³² Ni mwa emosa wa iyooniheryo hiyo naavahaahu, masomi avinre, mulipiheryo mwaamukhaani paahi wira ole ommalaru ophiya osuwele saana. Muluku, arowaka oKalvario, mpwino wa okhwa oryeene vasulu Vawe, ni waamutuma omurukureryaka, nto voakiserya waahimuluma mpakha Owo okhwa. Owo khukhwa mpakha nsuwa ohiya waarya. Owo khukhwa mpakha mweeri ni ithneneeri ohikumiherya waarya waya.

⁵³³ Tthiri, Owo aahaana wira yeeyo, wira okhalihe mpwino wa okhwa! Owo aakhanle-ru mutthu oohikhwa, Owo aakhanle-ru Muteyofaniiyani, wala okhala Muroohoni, okhwa khorina weettiherya yeeyo. Yaahaana okhala erutthu, wira Owo awerye okuxa mpwino wa okhwa. Masi okathi enwi wala mwaaxiithtu onlumaawe, owo apwiniharu mpwino, owo khonrowa olumatho. Owo onihiya mpwino awe mw'erutthuni. Nto ti yeeyo Kristu o... wala Muluku aakhanle-awe. Kristu aakhala mw'erutthuni, wira Owo awerye okeliha mw'erutthuni mw'Awe Yoowo mpwino wa okhwa. Nto okathi okhwa okhummyaaya mwa Yoowo vamwiikimanyo, waahihiya mpwino aya, khonweryatho omuluma mulipa-oowaamini. Owo onoowerya onyakula otumaka, onoowerya otuma ni woopopiha, masi khonwerya oluma. Khorina mpwino.

⁵³⁴ Paulo Oowaarya muulupale, moweettani mwawe orowaka okhwa, aahikhuwela ni khwira, "O okhwa, mpwino anyu ori vayi? Ni mahiye, oxinta wanyu ori vayi? Masi nimuxukhuruku Muluku Yoowo onivanhe oxinta mwa Pwiy'ahu Yesu Kristu, maana okhwa ni mahiye soopweteiwa owerya waya."

⁵³⁵ Vano, nto, Ettiminku evinre hiyo naahikuxa, "Nihiyaka ipacerelo sa mwiixuttiho wa Kristu," kapiitulu 6, ninsoma ela, "nrowe nikelele oloka voomalela." Ni noophwanya wira atthu olelo mwa ikereja sinci-ene, ni Tapernakulu Branham ni soohiyana-hiyana, hiyo khaninreere ohelelaxa osoma ipacerelo sa Kristu: Owo aari Mwaana a Abrahamu, Owo aari Mwaana a— a *Lexe ni lexe*, ni nintthikela, mmalokoni. Masi Bibilia ohimmye wira, "Nrowe nihiyе itthu iyo, nikelele oloka voomalela."

⁵³⁶ Yoopacerya muhaana osuwela mwiixuttiho, vano nto muhaana osuwela ithu iya sothene; vano nrowe nihiyе iyo epantte aya, owo ohimmye wira, ohihimuwa w'alipa-ookhwa, wiixaatherya matata, opatiiso, ni malakano awo othene ookhwa a Muluku. Nnya, iyo—iyo khasirina Ekumi mwa seiyo. Masi

ekereja olelo enrowela itthu seiyo, "Oh, hiyo ninnaamini oMuluku wa Kristu." Ayo. Tthiri. "Hiyo ninnaamini opatiiso wa mmaasini." Ayo. Tthiri. "Wiixaatherya matata."

⁵³⁷ Paulo ohimmye wira, "Hiyo nnimwiira sothene iya Muluku atthuna. Masi noonaka sothene iyo, nrowe nihiye vano, nikelele oloka voomalela."

⁵³⁸ Vano, ekereja khekhanle olokihiwaka voomalela ni mitthenkeso. Enootepa orowa ottaiwene wa Muluku, okathi wothene, wala ottaiwene wa khula mmosa ni mukina. Hiyo ninkweretha mikaano, nnimwiivalaaniha, vookhalaka ntoko ohikhala Waamini. Masi nto hiyo nahiyaru ipacerelo seiyo sa mwiixuttiho, nakelelaru oholo mpakha oloka voomalela, nto itthu iyo sikhaani sinkhala soohiphaveleyaxa.

⁵³⁹ Ninkela mopatthanani, ni ninniphwanya wira enamuna emosa paahi nikhanlyahu olokihiwa voomalela onkhala okhala mwa Kristu. Nto hiyo ninnoona nto, mwaha wa miixuttiho sa mBibiliani, moota onkelaahu mwa Kristu; kahi ni opatiiso wa mmaasini, kahi mwaha wo wiixatherya matata, kahi mwaha wo wiixuttiha. "Masi mwa Erooho emosaru hiyo othene noopatisiwa mw'Erutthu emosaru ni ninkhala oolokihiwa voomalela mwaha wo ohaawa Wawe." Vano, hiyo ninooneya voovirikana. Ninuupuwela voovirikana. Niniira voovirikana. Ninkhala voovirikana. Kahi mwaha wo wira muteko wala wira niniira mpantta wa ekereja, masi mwaha wa "ophenta Muluku omwaraxenle-awe voowaatta mmurimani mwahu ni Erooho Yoowaarya," onnikhaliha atthu anammuttettheni a Omwene wa Muluku, vano khasi-mo hata muromolelo wala ikhottiheryo memmo. Hiyo othene na Erutthu emosa yuulupale.

⁵⁴⁰ Vano hiyo noolikana wira nikelele nisomi na voosiisu, okathi vakhani. Etthu emosa tho kaathun'aka ophiyerya va, ekhanle, wira, Paulo alavulaka muLiivuruni, mwa 7, kiireke, kapiitulu 6, hiyo ninnoona va wira hiyo ninkhalihiva ooloka voomalela mwa Kristu. Vano eversiikulu 13 ya kapiitulu 6, mulipiheryo mwaamukhaani paahi.

*Tthiri okathi Muluku ammanenle-awe natiri
Abrahamu, okhala wira khaakhanle mutthu
muulupalex wira Owo omulaphele, owo aahilaphela
mmansawe,*

Muluku aailaphenle Mmansawe, okhala wira Owo khaakhanle omulaphelaka hata mutthu muulupalex.

⁵⁴¹ Vano nintthuna nitthike. Nrowe nikele mwa aKalasiya okathi vakhani paahi. Mukhunle Eliivuru ya aKalasiya, ni murowe aKalasiya 3:16. Nto ninrowa osoma va okathi vakhani paahi, ethu Owo aalaphenle-awe.

*Vano Abrahamu ni osuulu awe yaahilaiheriya natiri.
Owo khonihimya wira, Ni osuulu aya, ntoko anci-ene;
masi ntoko mmosa, . . . wa osuulu, okhanle Kristu.*

⁵⁴² Vano nyuwo mwaweha vale, musomaka eyo oratta-ene vano, okathi onsom'anyu.

...wa Abrahamu ni osuulu awe (mmosa)
yaahilaiheriwa anatiri (oowaatta).

⁵⁴³ “Abrahamu ni Osuulu awe.” Vano, Osuulu w’Abrahamu aari mmosa, yoowo aari Kristu; voolekana ntoko, Isakhi.

Masi Abrahamu aahikhalana aana anci-ene. Owo aahikhalana mmosa ohinatti okhalana Isakhi, yoowo ooniherya ovonya wa ohaamini wa Saara yoowo aamuthunne Aana wira amuyare mwaana, uupuwelaka wira owo khaareere wuuluvula, ni wira Muluku ovirihe eyo vasulu ni opaka enamuna ekina ohiya enamuna Owo aalaihenryaae wira.

⁵⁴⁴ Masi Muluku onnimmaliherya natiri Awe. Hata wira onkhala ntoko oohitthokeleleya sayi, Muluku ohaana ommaliherya natiri Awe. Nto Saara uupuwela wira khino owo aamuwerya omutthuniherya Aana, ahiiso, Hakari, kiireke, namuteko awe, omuyara mwaana ni Abrahamu, nto owo aammukuxa. Nto owo aaphiyenrye okhala Iximayeli, yoowo aari mwiiwa mw’erutthuni, okhuma vaavo mpakha olelo. Nlelo mwiiwa mw’erutthuni, maana vaavo t’ankhumaaya Aarapiya, ni awo kweekwe ankhalaka siiso.

⁵⁴⁵ Vano, khula okathi muhinaamini anyu Masu a Muluku voovooneya ni opaka enamuna ekina, onookhala mwiiwa mw’erutthuni mwanyu okhuma vaavo mpakha oholo. Mukuxe paahi ele Muluku ehimmy’awe. Vakhala wira Owo ohimmye Yeeyo, eyo t’ile Owo onihimy’awe. Oh, nittottopeliwe Nsina Nawe! Mukuxe Masu Awe paahi.

⁵⁴⁶ Khivancala ethu xeeni eneererya oxerema, wira, “Ahe, vekeekhai Eyo khenihimya Yeeyo.” Enihimya vekeekhai ele Eyo enihimy’aya, okathi Muluku onimmanaawe natiri.

⁵⁴⁷ Vano hiyo naweha vale oratta-ene.

...*Abrahamu ni osuulu awe yaari anatiri*...

Mmosa aari Osuulu, mmosa, nto akina yaari anatiri. Ookhala natiri oovikana mmosa, ni oovikana mutthu mmosa okelihwiwe mwa Osuulu wa Abrahamu. Munnona? Ori Osuulu mmosa, masi atthu anci-ene a Osuulu yoola. Munnona? Awo kхиyaari wa Abrahamu paahi, wala Isakhi meekh’awe. Masi...Aari wa Osuulu wothene wa Abrahamu. Anatiri aamaneliwe khula osuulu voomeekha wa Osuulu ule. Munniwa?

⁵⁴⁸ Tivo, hiyo, nikhwaaka mwa Kristu, ntoko sinihimaaya Soolempwa, hiyo ninkuxa Osuulu w’Abrahamu ni n’atthu oorithi voomutthariha natiri. Kahi mwaha wo wiitakaninha mukereja, wala opaka malakano ookhwa, wala—wala sikina. Masi mwaha wo oyariwa ni Erooho ya Kristu, hiyo na Osuulu w’Abrahamu, ni n’alipa oorithi vamosa ni Yoowo Momweneneni.

⁵⁴⁹ Vano ninookelela ohoolo, nisomaka, nto, vakhani-tho vano, “Muluku alaphaka.” Vano versiikulu 17 ya kapiitulu 6.

Mwa yeeyo Muluku, aphavelaka vanci-enexa . . .

. . . Muluku, aphavelaka vanci-enexa owooniherya ale oomurithi natiri otthuna wawe ohinvirikana, aahilipiherya olaphaka:

⁵⁵⁰ Oh, nrowe nimumule paahi vano minuutu vakhani. “Muluku atthunaka.” Kahi wira Owo aahaana wira, masi wira akhalihe yeela ethu yoolipa.

⁵⁵¹ Vano, hiyo noophwanya wira Muluku aahiipaka erutthu, khukhala ni hiyo, motta Owo aaisoonihenry’awe Mwaneene molumwenkuni. Okathi Owo aamphwannye-awe muthiyana mooraruwani, khwira, “Miyo nki—miyo nkinoohukhumuni. Murooke, muhittheke-tho.” Okathi Owo omphwannye-awe muretta, Owo aairale enamuna Owo waariaawee wiiraka, okhala wira Owo aari Muluku, ni Owo—Owo aahaavonih arettu. Owo aahaahihimuxa alipa—ookhwa. Owo aahilevelela itampi. Hata wira saari sayi, ni kavi, ni ale ootthikela ottuli, Owo ohaalevelela, khula enamuna, awo yaatthunne-ru orwa khuveka.

⁵⁵² Vano nwehe. Vakhala wira Muluku ootoko wira emaara emosa mwa yookhumelela emosa, ni yookhumelela yeeyo yairaneya-tho, Owo ohaana wira okathi wa neenli ntoko Owo sairaly’awe emaara yoopacerya ahiiso Owo t’ohikhala a exariya. Munnona? Hata wira muri mutampini vootakhala motta xeeni, vathi xeeni mukhanlyaanyu, Owo ohaana owiirelani ntoko Owo saamwiirenlyaaawe muthiyana ole aamonre ahiiso Owo aahiira voovonyeya iwe. Eyiirelo ya Muluku ti oMutthu Awe, ni ethu Owo okhanly’awe mwa eyiirelo Awe ennihimya oMutthu Awe.

⁵⁵³ Nto ti siiso nyuwo siry’anyu, ni eyiirelo anyu ya makhalelo, ennihimya ele mukhanlyaanyu. Ntoko saarinaahu ni nisomalyaahu, nisomi nimosa wala maili avinre, attu aMetotista yaathunne ohimya wira, “Mwaakhuwelaka, muhaakhela Eyo.” aPentekosite anira, “Mwaalavulaka ilavulelo, muhaakhela Eyo.” Namathukumela khwira, “Mwathukumelaru, muhaakhela Eyo,” Anamatukumela a oPennsylvania. Nto hiyo ninnoona wira othene aya t’ovonya. Makhalelo anyu annihimya Eyo. Omuthu anyu onnihimya ele nyuwo mukhanlyaanyu. Mutthu onsuweliwa mwaha wa miteko sawe, ale akhanle makhalelo anyu.

⁵⁵⁴ Muhiwa ehantisi ya khalayi, “Makhalelo anyu annilavula vanci-ene, nkinwerya wiiwa moolumo anyu.” Tivo ethu p’itthu mukhanlyaanyu, mwa yeeyo. Makhalelo anttharaanyu annoonihera muthinto xeeni wa erooho ori mwa nyuwo.

⁵⁵⁵ Vano nto nyuwo pooti otakihera ethu yoonanara, wala, otakihera ethu yooloka, kitthunne-aka ohimya. Nyuwo pooti omutakiha muKristu. Masi, nuuvira okathi, onoophiya

okathi okokheya onrowaaya wiiraneya, nto onimooniherya ele mukhanlyaanyu. Ekwirinti ti yoolipaxa vanluttenti vaya nootteettheyaxa.

⁵⁵⁶ Okathi Kristu Mwaana a Muluku oheliwaawe moweehereriwani, yaahooniherya etthu Owo aary'awe. Vekeekhai. Nyuwo mwaheliwaru moweehereriwani, enimooniherya ele nyuwo mukhanlyaanyu. Makhalelo anyu kweekwe annooniherya ele eri muhina mwanyu. Oviraka okathi, mukupali wira itampi sanyu khasinoottemulelani. Nto ti yeeyo hiyo emphavelaahu ohimya.

⁵⁵⁷ Yesu oohimya, mwa Yohani Oowaarya 5:24, “Ole oniiwa,” kahi ole onthukumela, ole onlavula, ole oni...“Ole oniiwa Masu Aka, ni onimwaamini Ole okirumme, ookhalana Ekumi Ehinimala, ni khonrowa olamuliwa; masi oovira mookhwaani khuphwanya Ekumi.”

⁵⁵⁸ Iwo waamini wanyu. Nto waamini wanyu, woohimmwa ni iyano sanyu, onsuweliheya w'atthu anwerya wiiwa, masi makhalelo anyu t'otthukuwa oholoo w'atthu othene. Vano, khivancala enamuna xeeni muneerery'anyu wira *ela* ni wira *ela*, khenrowa ovaru etthu. Ehaana okhala mwa nyuwo. Eyo ti erimarima y'ekekhai ya wahala othene. Omwaamini wanyu Kristu ohimunwe, okhala Moopoli anyu; wira Owo ori moono woolopwana wa Muluku, airaka voopuroni vanyu voosiis'ula, ntoko nyuwo sinir'anyu voopuroni Vawe vathi va ntoko namoona. Namoona ori wira ovareke muteko voopuroni va mutthu, oweemereryani ntoko namoona. Nto okathi makhalelo anyu annooniheryaaya va ole okhanle onamoon'anyu mwa Kristu, eyo ennooniherya iwe ni ennooniherya nno. Ni Owo ori osulu iwe, ele Owo okhanly'awe wa nyuwo, ennooniherya iwe ni nno. Tivo nyuwo mwa...Mwaha wo waamini wanyu, nyuwo munnoopowa, nto yeeyo paahi. Vano, miyonelo, wuukhuwa, miyonelo, etthu p'itthu, kherina hata opuro mwa Yeeyo tu. Vano, kahi...

⁵⁵⁹ Vano, muhuupuwela voovonyeya, wira miyo nkinaamini iyuukhuwelo iya. Vekeekhai. Masi entthunaahu vano, niphavelaka waalipiherya atthu ala a nihiku nla, khasihiyo iyuukhuwelo. Xetwani orookuxa itthu iyo khurowa voowali n'atthu, khwaahiya olipiherya ekiseryo aya ya Ohimala vasulu va eyuukhuwelo. Okhuwela, olavula ilavulelo, orowa okereja khula Ettiminku, wiira ntoko muKristu, eyo khenrowa okhala nnaata nihiku nle. “Mutthu aahiyariwe-ru vasya.” Ni makhalelo anyu annooniherya etthu mukhanlyaanyu muhina, moone, kahi iyuukhuwelo sanyu.

⁵⁶⁰ Mwaamuwerya okhalana ephome mmamatani mwanyu, mwaamuwerya olavula ilavulelo, mwaamuwerya waavoniha aretta, mwaamuwerya othamiha miyaako ni waamini wanyu, nave nlelo khuhikhala etthu. aKorinto Oopacerya 13. Munnona?

Ehaana okhala ethu ekhumelenle mwaha wo Oyariwa onkhuma wa Muluku, nto Muluku onniruuha Oyariwa vasya mwa nyuwo, ni woovahani epantte ya Yoowo mwaneene. Vano itthu iyo ti siiso. Nyuwo mwa yoopattuxiwa esya. "Miyo kinnaavaha Ehinalima."

⁵⁶¹ Hiyo noovira mwa nuulumo "Ehinalima." *Mahiku othene* ti "evirelo y'okathi." *Ehimalelo* ti mahiku othene, mahiku othene ni mahiku othene, masi eri Ehimalelo emosa paahi. Ni ninnona wira nyuwo munaakhela Ekumi Ehinalima, ni nuulumo mw'Ekereku ti *Zoe*, nenlo nnihimya "Ekumi ya Muluku." Ni nyuwo munaakhela epantte ya Ekumi ya Muluku, yeeyo enookhalihani nyuwo mwaana a muroohni a Muluku, ni nyuwo munkhala oohimala ntoko Muluku oohimala siryaawe oohimala. Khamurina emalelo, hata nipuro no weemela, okhala wira khamwaarina hata nipuro wira mpacerye. Khula ethu erina epacerelo yookhalana emalelo, ni ele ehirina epacerelo kherina emalelo.

⁵⁶² Moota nimpagenta Masu awo ooreeraxa! Moota muKristu orinaawe olipihiwaka mwa Waamini waavahiwe atthu ooreera murima khalayi, ni ohikhala ooveveleiheriwa, nipuro nnipuro, ni wiitakanxa ikereja soovirikana. Khula ekereja entthun'anyu wira mpantta ti vooreera, vakhalaru wira mwa muKristu. Masi yoopacerya muhele ethu yoopacerya, okhanle Oyariwa iwo onookhalihani mmusi ni Muluku, ntoko Muluku saakhanly'awe mmusi ni nyuwo.

⁵⁶³ Owo aahikhala mmusi, wira Owo oohihimuxeni. Owo ohinatthi owerya woohihimuxani, ohaana woovahani Ekumi Ehinalima. Vano Muluku aahaana okhala mmusi, wira okuxe okhwa, wira oohihimuxeni. Vano muhaana okhala mmusi wa Yoowo, wira murowe mohihimuwanu. Munnoona exeeni iyo? Eyo eyaakkakhanyero paahi. Muluku aikhalinhe nyuwo, wira nyuwo mukhale Muluku. Munnona? Muluku aaikhalinhe epantte ya nyuwo, erutthu, wira nyuwo ni mahala Awe mukhale epantte ya Yoowo, ti yeeyo tu, wira mukhalane Ekumi Ehinalima.

⁵⁶⁴ Elatarato yooreera, ni, oh, hiyo enninisivela.

Vano, *Muluku, aphavelaka vanci-enexa . . .*

⁵⁶⁵ Khaarina wira, masi Owo aaniththuna wira. Kinnitthapa mwaha wa yeeyo, ankhi nyuwo, wira Muluku ahu onnitthuna? Nkawehani. Ankhi Owo—ankhi Owo ahaakhanle oovilela? T'uvu okhanle muhokorokho wa Erooho? Ophenta, ohakalala, waamini, murettele, ovilela. Eyo epantte ya Muluku eri mwa nyuwo. Ni enwerya ovilela, ovilela miritti sa mmosa ni mukhwaawe. Mulevelelanaka mmosa ni mukhwaawe, siiso Muluku mwaha wa Kristu onoolevelelaaweni. Erooho ya Muluku mwa nyuwo enniwiirihani siiso. Vano nto okathi Muluku aary'awe muumu elapo ya vathi khukhala nyuwo, khukhala etampi, wira Owo akuxaka itampi sanyu, oovilela mwaha

wa nyuwo khuliva ehukhumu aya. Muluku t'ovilela, ovilelaka miritti sahu.

⁵⁶⁶ Vano nto Owo Muluku ooreera murima. Nyuwo mwaththuna vale, itthu kamosa-kamosa mwa enamuna anyu, nyuwo moosuwela, Muluku t'oreera murima voophiyerya wira aire yeeyo. Owo onnimusivela wo—wookhalihani ooteeliwa murima. Owo onthuna o...Owo—Owo ophentaa, ni ophenta Wawe wuulupale onnimukhanyererya Owo hata okhuruwa imaara sikina, wira ootthuniheryeni okhalana itthu muntthun'anyu.

⁵⁶⁷ Nkanweheni Tome, nuumala ohihimuwa. Tome khaamini. Oh, owo ookhalana aana anci-ene olelo. Masi Tome iirale, “Nnari. Nnari. Kihaana okhalana eyooniheryo emosa. Kihaana ohela matata aka mpararini mw'Awe, nto mwa Yawawe... ikatha saka va mmatatani mw'Awe, kihinatthi waamini Yeeyo. Miyo, nkincala ethtu munihimy'anyu.” Moone, owo aari ota wa yootthariha ya Soolempwa, okathi ene yoole. Nyuwo muhaana waamini Iyo. Vano owo khwira, “Kihaana okhalana enamuna emosa ya eyooniheryo, wira elipiherye Yeeyo.”

⁵⁶⁸ Nto Yesu aahikhumelela, Owo t'oreera murima, “Murwe, Tome, yaari yeeyo muntthun'anyu, ahe, ela va. Munoovaliwa.”

⁵⁶⁹ Ti siiso hiyo siry'ahu. Hiyo niniira, “Pwiya, kihaana olavula ilavulelo. Miyo—miyo kihaana okhuwela. Miyo kihaana...”

⁵⁷⁰ “Oh, mwiireke, kinnoovahani.” Owo t'oreera murima.

⁵⁷¹ Vano owo khuhela matata awe mpararini mw'Awe, nto owo khwira, “Oh, t'Apwiya aka ni Muluku aka.”

⁵⁷² Owo khwira, “Vano, Tome, munnaamini okhala wira muhoona. Masi aatepa otthuveliwa ale ahikhalanne eyooniheryo nave nnakhala vo anaamini Yeeyo!” Eyo eri vo. Ti vaavo nirin'ahu ophiyerya. “Aatepa otthuveliwa ale ahoonale ethtu masi nnakhala vo annaamini Yeeyo.” Eyo eyiirelo yo waamini, wira hiyo ninnikupali Yeeyo.

⁵⁷³ Vano, miyo kinnaamini wira ithoonyeryo sinnaatthara alipa-oowaamini, masi nrroe nihele itthu soopacerya toko. Munooverya okhalana ithoonyeryo, muhikhalanne Ela. Paulo ohimmye wira mwaamuwerya. Owo ohimmye wira, “Hata kaamuwerya olavula ilavulelo ntoko atthu ni Malaikha; nkiihiyo eththu. Hata kiweryaka othamiha miyaako ni waamini waka; nkiihiyo eththu. Hata kaawerya omusuwela Bibilia, mwa enamuna emosa kaarowaaka osuwela isiiri sothene sa Muluku; nkiihiyo hat'etthu.” Moone, iyo soovaha sa Erooho Yoowaarya, voohikhala Erooho Yoowaarya.

⁵⁷⁴ Erooho Yoowaarya ti Muluku. Muluku ophentaa, ohakalala, murettele, ohiviruwa pure, oreera murima, ovilela. Eyo Erooho ya Muluku. Ti yeeyo Muluku onvenx'awe mahiku ookiserya, mwa Erooho yeeyo.

⁵⁷⁵ Vano, “Ahitthunaka...”

... *Muluku, aphavelaxaka vanci-enexa wira owooniherye alipa-oomurithi natiri...*

... *Muluku, atthunaka vanci-enexa...wira owooniherye...alipa-oomurithi...*

T'ani akhanle alipa-oorithi? "Hiyo, nikhwaaka mwa Kristu, ninkhala Osuulu w'Abrahamu, ni n'alipa-oorithi." Oh, eyo ennikela saana? Hiyo n'alipa-oorithi a Omwene wa Muluku, mwaha wa natiri olapheliwe. Muluku khaarina olaphaka. Masu Awe t'oloka. Masi Owo aahilaphela, nave, Mmansawe, okhala wira khaakhanle hata mutthu muulupalexia.

⁵⁷⁶ Nitthikelaka osoma, okathi vakhani paahi, nwiriyane.

... *natiri a otthuna wawe ohinvirikana, aahilipiherya alaphaka:*

⁵⁷⁷ "Ohivirikana," ohirukunuwa. Muluku khokhanle orukunuwaka. Owo ohaana okhala mmosaru. Nto vakhala wira Muluku oonvoniha mutthu aawereiwa, Owo khokhanle orukunuwaka mwiirelo Awe. Muluku amulevelela natampi mmosa, namuttompe mmosa, Owo khokhanle orukunuwaka mwiirelo Awe. Ohivirikana, ohirukunuwa wa Masu a Muluku. Muluku oohimya, nipuro nimosa, "Miyo k'Apwiya anvoniha iretta sanyu sothene." Owo ohaana okhala ni Yeeyo, maana Owo t'ohimala. Owo aanisuwela emalelo okhuma wopaceryani.

⁵⁷⁸ Vano, miyo pooti ohimya wira, "Miyo kinimwiira *ela*." Ni Bibilia ohimmye wira, nihaana wira, "Apwiya yathuna vale." Okhala wira, miyo ka mutthu onkhwa. Miyo nkisuwenle. Imaara sikina kihaana ottikiha nuulumo naka, masi Muluku khokhanle ottikhaka Nawawe. Owo ti Muluku.

⁵⁷⁹ Nto Owo ovekenle etthu emosa paahi, "Mwaaweryaka waamini." Oh, wulu! "Mwaaweryaka waamini, sothene sinniweryaneya." "Mwaaweryaka waamini," ti yeeyo tu. "Nyuko, mwawerya vale," eyo ti yothene. Masi kahi erookhala yoohoverya mwa Masu a Muluku, mwaha wo wira, ohivirikaneya Wawe, Owo khokhanle orukunuwaka. Ti yoothamaleya!

⁵⁸⁰ Vano nwiriyane, okathi ontthikelaahu osoma.

Wira mwaha wa itthu piili sihinvirikanyeya, mwa seiyo vahinweryaneya Muluku wootha,...

Khivanweryaneya! Ohiweryaneya ni ohivirikanyeya vekeekhai nuulumo nimosaru; khinrukunuwa, khentikinyeya. Ehaana okhala emosaru mahiku othene. Khivanweryaneya orukunxiwa, ohivirikanyeya ni ohirukunuwa.

Ni piili, *mwaha wa itthu piili sihinvirikanyeya, mwa seiyo vahinweryaneya Muluku wootha,...*

"Nookhalana itthu piili?" Ayo. Yoopacerya, Masu Awe ahimmye wira Owo aamwiira. Yaneeili waari mwaataano Awe woolamphwa mwaha wa yeeyo, Owo aamwiira. Oh, wulu!

⁵⁸¹ Muthinto xeeni wa atthu waatthuneya hiyo okhala? Xeeni nrinaahu okuxiwaka nno ni iwe ni otthimakasa mapuro othene, ni okuxa itthu sa molumwenkuni ni wira ntoko etharihelo ela ya oKristu wa naanaano wa 1957? Nintthuna nikhale oopakiwa wa enamuna ya khalayi ommukuxa Muluku mwa Masu Awe, ni oniihana itthu iye sahaakhanle, ntoko saakhanle. “Vakhala wira Muluku ohimmye siiso, Eyo ennimaliha mwaha.”

⁵⁸² Abrahamu, yoowo aalaiheriwe natiri, yoowo ni Osuulu awe, owo aaihanne itthu sahaakhanle, ntoko saakhanle. Maana, Owo aari natiri a Muluku, asuwelaka wira Muluku khaakhanle woothaka. Owo aahimulaiherya eyo, ni owo aahaamini Yeeyo. Nto sivinryaaya miyaakha, ni natiri onakhala ntoko orowa ottaiwene, wa niitho n'erutthu, Eyo yaakhala vakhviruxa ni Abrahamu.

⁵⁸³ Ohiya okhala ootteettheya, ni wira, “Ahe, khino kхиivo ethu ene eyo ntoko ovoniha wa Muluku. Khino miyo kinoorowa paahi—. . . Khino kхиivo ethu ene eyo. Khino miyo kaahivonya mwa miyuupuwelo saka sothene.” Vano, eyo ennooniherya ethu emosa, wira khimuyariwe vasya. “Maana ti. . .”

⁵⁸⁴ Hiyo naahuuluula Ettiminku evinre, nitthikelaka vakhani paahi ekapiitulu. “Tthiri ti voohiweryaneya wa mutthu otonko olawisha soovaha sa Wirimu n’itthu siiso, onimora, otthikela-tho orukunuxa murima.” Vekeekhai, yoohiweryaneya mara!

Okhala wira ole *oniyariwa ni Muluku khoniira ni khokhanle wiraka etampi; maana epyo ya Muluku enkhala mwa yoowo: ni khokhanle wiraka etampi, . . .*

Epyo ya Muluku ti Masu a Muluku. “Waamini onrwa mwaha wo wiiwa, wiiwa Masu, ‘Mukuttho woovahiwa. Sothene soomala.’”

⁵⁸⁵ Vano, nyuwo mwaira yoonanara, Muluku onimoolivihani mwaha wa yeeyo. Masi mwaira vale, mwavonya, nyuwo khamuniira vootthuna. Kapiitulu 10, versiikulu 47, kookupali, “Okhala wira naakhanyereryaka wira etampi vootthuna numala waakhela osuwela wa Ekeekhai.” Masi vammal’anyu Oyariwa, mookhalana Ekeekhai; kahi osuwela wa Yeeyo, masi nyuwo mookupali Ekeekhai ni Eyo yoophiyerya okhala ekhweeli. Nto nyuwo mwa mwaana a Muluku, wa okathi ni Ehimalelo. Muluku oolapha wira Owo aamwiira.

⁵⁸⁶ Yesu ohimmye wira, “Ole oniwa Masu Aka, ni onimwaamini Ole okirumme, ookhalana Ekumi ehinimala, ni Miyo kinoomuhihimuxa nihiku nookiserya. Owo khonrowa Olamuliwa. Owo oovira mookhwaani khuphwanya Ekumi.” Vano ni elaphelo ntoko eyo, “Muluku otthunaka wira naakhele Eyo.”

⁵⁸⁷ Vano nwehe etthu enihimy’awe va, Paulo alavulaka ni e—ekereja.

...ti *yoohiweryaneya* *Muluku wootha, hiyo nihaana okhalana olipihawa murima oratta-ene*, . . .

Kahi, “Ahe, aPatista yaahikeettele oratteene, kinoorowa wa aMetotista.” Munnona?

...*hiyo nihaana olipihawa murima oratta-ene, hiyo nitthyawenle wira naakhele nroromelo ori oholo wahu*:

⁵⁸⁸ Vano nisomaka yookiserya.

Hiyo nrinaahu nroromelo ntoko nankura a munepa, . . .

Nroromelo, elaphelo ya Muluku, hiyo nookhalana ntoko nankura a munepa, oolipa ni oororomeleya, weiwo onvolowa mpaani mwa ekuwo;

⁵⁸⁹ Nrowe nilavule okathi vakhani “ekuwo.” Hiyo khinaaphiyenrye yeeyo saana Ettiminku evinre ohiju.

⁵⁹⁰ “Mw’ekuwo.” Ekuwo ti erutthu. Ekuwo t’ennikhottiherya omoona Muluku, ethoni ni ethoni, mukereja mu. Ekuwo t’ennikhottiherya woona Malaikha voopuroni vaya voosiis’ula, yeemenleene vakhiviru va ikhatera. Ekuwo t’ennikhottiherya omoona Yoowo. Hiyo nrimwiipithihiwa ottuli w’ekuwo, nto ekuwo eyo erutthuu. Hiyo n’ana axilopwana n’axithiyana a Muluku, hiyo nri Oholo wa Muluku, “Malaikha a Muluku ankhala vakhiviru naale animoova Yoowo.” Hiyo nri Oholo wa Muluku, okathi woethene. “Miyo nkinoohiyani, nnakhala nkinoonyanyalani. Miyo kinookhala ni nyuwo mahiku othene, mpakha woomalelani.” Masi ekuwo erutthuu, ti yeeyo ennikhottiherya okela Oholo Wawe. Masi ni munepa, Erooho, mwaha wo waamini wahu hiyo noosuwela wira Owo onniniweha. Owo oneemela vakhiviru ni hiyo. Owo ori vaava naanaano va.

⁵⁹¹ Wu oDotani, voosiisu umosa, profeta muulweene aahikutteleliwa ni muttitthi w’anakhotto nto murumeyi awe khukhuma khwira, “Oh tiithi, elapo yothene ti yookutteleliwa ni amalapo.”

⁵⁹² Nto Eliya khuvenya, khwira, “Vano, mwan’aka, aakhala anci-ene ni hiyo waavikana ale ari n’awo.”

⁵⁹³ Ahe, owo ophunya maitho awe khuweha mapuro othene. Owo khaawerya woona hat’etthu.

⁵⁹⁴ Owo khwira, “Muluku, miyo kaathuna wira Nyuwo mutthukule maitho awe, mukumihe ekuwo.” Nto ekuwo vamoroxiwaaya mmaithoni mwawe, simurukurenrye profeta ole saari ikaaro sa mooro, miyaako saavarela Mooro ni Malaikha ni ikaaro. Eyo eri vo.

⁵⁹⁵ Oh, nto Gehazi aaniwerya wira, “Miyo—miyo kinnisuwela saana vano.” Moone, ekuwo yaahimora. Ti vaavo vari ekhottiheryo.

⁵⁹⁶ Ela eri va. Nvarele saana. Ekuwo t'ennikhottiherya okhala makhalelo enamuna vaatthuneyaaya. Ekuwo t'ennikhooftiherya wira itthu sintthunaahu vekekhai wira. Nto Muluku aasisipithinhe mw'erutthuni, nto ekuwo khukheriwa ipantte piili. Vano Muluku khukhala-tho Muluku, vano Owo aahivenxa ekuwo yeeyo Owo aasisipinthe-awe-mo Mmansawe. Iwo ohihimuwa wa Pwiya Yesu. Onooniheryaka hiyo wira, mw'ekuwo yeela hiyo niipinthaahu-mo, mwaha wo waamini hiyo ninnaamini Yeeyo ni ninnikhupali Yeeyo. Nto okathi ekuwo *ela* enikheriwaaya ipantte piili, kinoorowa Ohoolo Wawe ni olipa wенно, kisuwelaka wira, "Miyo kinnimusuwela Owo mwa owerya w'ohihimuwa Wawe." Orwa wa Pwiya Yesu, ekuwo ela enoovenxiwa-tho, mwa enamuna yoolokihiva voomalela, mpakha onrow'aka weetta n'ulavula ni Yoowo ntoko Moopoli aka ni Muluku aka, okathi Owo onikux'awe ehice ya Davidi. Nto ninookhala mahiku othene mukuwoni yeela nuumala olokihiwa voomalela, masi ekuwo ela yookhalana etampi mwa yeela. Khencala moota... Muhuupuweleke erutthu iyo yoovuwihiwa mulaponi mu. Ehaana okhwa, siiso ntoko munep'anyu orinaaya okhwa, wira oyariwe vasya.

⁵⁹⁷ Moolokani voomalela, kahi okhuura inama, ni wira *ela*, ni olokiha erutthu, khamunkhalakhala nweryaka. Ni nyuwo muhaana ohiya *ela*, ni wira *ela*, ni wira *ela*, eyo ekano. Iwo otthariha ikano. Hiyo khinnaamini inamuna s'otthariha ikano sa woopowa. Hiyo ninnaamini Iyo wira ni mahala hiyo ninnoopoliwa. Ni khamuhayo nyuwo. Nyuwo khamurina-vo yawinyu. Iwo othanla wa Muluku oniira. "Khaavo onwerya orwa wa Miyo ehikhanle wira Atithi Aka anoomuruuha." Ti yeeyo. Ni Owo... Sothene Yesu aarwenly'awe wira waari waakuxa ala Atithi yaasuwenly'aya khalayi ene; ni khwaatthoma ohinatthi opattuxiwa olumwenku wira ekhale aana alopwana n'athiyana a Muluku. Amen. "Kahi ole ontthyawa, wala ole ontthuna, masi Muluku onooniherya omoriwa ikhlarari." Muluku oniira. Khimukhanle wiihimyaka, nnakhala. Khekhanle ethu mwiiralyaanyu. Muluku, ni mahala, owoopolani; khamuhayo nyuwo, mmansinyu. Vaari siiso, mookhalana ethu yo wiihimyano. Masi nyuwo khamurina hat'ethu yo wiihimyano. Mittottopelo sothene sinrowa wa Yoowo. Ti Yoowo. Vano Owo ohoovahani nroromelo woolipa, "Olamphe-awe ni elaphelo, ohiweryaneyea wira aana Awe anoophiyererya opweteya."

⁵⁹⁸ Vano, awo annaakhela miwaxuxo mwaha wo wira yoonanara. Nyuwo munihepa ele enaalaanyu. Munnaakhela. Muhuupuwele vano wira munookhuma paahi n'uttheka, khuhiraneya ethu. Mwaairaka vale, ni okhalana mweettelo yoowo, enooniherya wira khimunayariwe vasya. Munniwa? Vakhala wira nlelo mookhalana otthuna mwa nyuwo, wo wira yoonanara, weeso nlelo moovonya. Munnona? "Maana Owo ohaalokiha voomalela, mahiku othene, ale ari... Ni inama iye

vathi va Waataana wa Khalayi, vathi va mahiku a malamulo, saavahiwa khula mwaakha, voohihiyererya, khisaawerya okumiha etampi.” Masi okathi onihel’ahu matata ahu vamuru Vawe, n’ulapa itampi sahu ni oyariwa vasya ni Erooho ya Muluku, hiyo khanrina-tho otthuna etampi. Etampi ehoovirani. Eyo ti wa okathi ni Ehimalelo.

⁵⁹⁹ Munooovonya. Munoomora. Munimwiira yoonanara vootthuna. Munookhuma imaara sikina mwire itthu. Eyo khenihimya wira moopweteya. Eyo enihimya wira munimwaakhela nttharuxo.

⁶⁰⁰ Mwammiravo aka, imaara sinci-ene, an’aka, animwiira itthu. Ale awinyu, nave. Wira nyuwo... Awo annisuvela wira eyo ti yoovirikanya awinyu—malamulo anyu. Ni annisuvela ethu yo owehererya awo yaairaka. Awo anoorowa waakhela nwaxuxo mwaha wa yeeyo, imaara sikina woolipa saana. Masi nlelo ti mwan’inyu. Vekeekhai.

⁶⁰¹ Ti yoohiweryaneya mutthu uwo orimeela-tho, yoowo otonko oyariwa a Ekumi Ehinimala. Muluku kahi nanvaha Muhinti. “Ole oniiwa Masu Aka, ni onimwaamini Ole okirumme, ookhalana Ekumi ehinimala; ni khonrowa Olamuliwa, masi oovira mookhwaani khuphwanya Ekumi. Miyo kinoomuhihimuxa mahiku ookiserya.” Owo ti natiri a Muluku.

⁶⁰² Vano nyuwo mwaathikelaka, wira, “Oh, ahe, nto miyo kinoowerya wira paahi...” Miyo okathi wothene kiniira ele entthun’aka wira. Masi nyuwo mwakhala muKristu, khamunthuna wira ethu ekhanle yoonanara, okhala wira Ekumi yeeyo eri mwa nyuwo, mulipiheryo yoowo. Nyuwo mwaaththunaka wira yoonanara, eyo enooniherya ethu yoovonyeya eri nuhina *mu*. “Vanweryaneya sayi maasi oowaawa ni oosiva okhuma ehimye emosaru?”

⁶⁰³ Tivo nyuwo mwakhala othene ootepanyeya ni muthinto mmosa wa eyuukhuwelo, wala moonelo *wa ethu emosa* yowooothererya: Muliyale! Mutthikele waltaari mwiire, “Muluku, mukumihe makhalelo aka a khalayi a etampi, nto mukihele mukhalelo mmosa otthuna waka wothene...”

“Ole oniyariwa ni Muluku khoniira etampi.” Eyo ekeekhaii. Owo khonthuna wira siiso.

⁶⁰⁴ Vekeekhai, xetwani onoomureya ntapha *va ni iwe*, masi kahi vootthuna. Bibilia ohimmye siiso. Xetwani onoomureya ntapha, imaara kamosa-kamosa. Vekeekhai, owo onimwiira. Owo aaheererya omureya matapha Pwiy’ahu Yesu. Owo aahimwiiriha Moise, khunvara. Owo aahimwiiriha Petru, khunvara. Owo aahiwirela anci-ene, masi... Petru hata aahimukhootta, masi nto owo aahirowa khunla vooripiha-vo murima. Yaahikhala Etthu mwa yoowo.

⁶⁰⁵ Okathi epompa yaakumihiwaaya mukalawani... Nakhuku aahikhuma, aahiipa arukureryaka. Owo aari mukalawani

tthiri, masih okathi okhumaly'awe, mukhalelo awe waari woovirikana. Owo aaniwerya okhuura mawuluwusa othene ookhwa owoaatthun'awe, ni okhala oosiveliwa. Mwaha wa xeeni? Owo aari nakhuku, opacerya wene. Owo aari namathola-thola yoolya. Owo khaari ooloka. Owo aari namirimia miili aakilaathi varinttani n'epompa, ntoko epompa yaaryaaya. Owo aaniwerya ovava nipuro pi nipuro epompa yaaweryaaya ovava. Masi owo aaniwerya olya yoolya yooreera ntoko epompa yaaly'aya. Vano nto owo aaniwerya olya yoolya yoowunnta, epompa yahaawery'aya olya. Maana, epompa erina epakeliwo yoovirikana. Eyo epakiwe voovirikana. Eyo epompa. Ni epompa khenwerya othotihayoola yowunnta, okhala wira kherina wamwe.

⁶⁰⁶ Ni mutthu oniyariwa ni Erooho ya Muluku onkhala epompa ya Muluku, mukhalelo awe, orukunuwa wawe, epakeliwo awe. Ayo, mulopwana. Mmuhelele erooho ya—ya epompa nakhuku, owo khonkhalakhala okatelaka vasulu va niwuluwusa nookhwa. Owo amorelaru mwaha wo ovonya, vekeekhai owo onookhuma voowaakuva. Owo khaawerya ovilela. Ni mutthu oniyariwa ni Erooho ya Muluku, khonrowa ovilela. Owo khino aamukela mpaare emaara emosa, masih owo onookhuma-mo naanaanoru. Muthiyana pooti omuwoka, omurukunxa, masih onoorukunxatho muru awe. Owo onookhuma-vo naanaanoru. Mwaha wa xeeni? Owo epompaa. Ti yeeyo. Khamunrowa omoototha, okhala wira owo onnisuwela. "Ipwittipwithti Saka sinnisuwela Nsu Naka, iyo khasimmuthara mutthu sinimutikhinaya." Owo epompaa, opacerya wene. Ti yeeyo enihimyaaka, ekekhai ya etthu enlipiheya muhina mmwe.

⁶⁰⁷ Nwehe oratteene vano. "Muluku oolapha." Oh, eyo . . .

*Hiyo nrinaahu nroromelo ntoko nankura a
munepa, . . . oororomeleya, ni weiwo onvolowa
mpaani—mpaani wa ele ekhanle ekuwo;*

⁶⁰⁸ "Ekuwo." Muluku aahikhuruwa, oowiipitha mw'erutthuni. Wira aire exeeni? Wira aisoniherye Mmansawe. Owo aahaana wiisiipithiha, okhala wira hiyo khinaawerya omoona Owo. Nto Owo aisiipithinhe ottuli w'ekuwo. Nto ekuwo aari Pani? Yesu. "Nkihiyo Miyo kinvara miteko, Atithi Aka," ohimmye ti Yesu. "Atithi Aka ankhala mwa Miyo. Miyo kinnivara muteko. Atithi annivara muteko, ni Miyo kinnivara muteko mpakha va." Owo ori va ntoko Ole oowiikhuneela, eettaka mw'erutthuni, Muluku, Emanuweli, Muluku ni hiyo. "Muluku aari mwa Kristu, aataanihaka olumwenku ni Yoowo." Owo ori va eettaka.

⁶⁰⁹ Vano, Owo aahikhuruwa khureeriha, ahiiso evaheryo, wala ettipiheryo, yeeyo mwaha wo okhwa Wawe ovaheriwe, ooliva ehisapo ya etampi, wira Owo awerye otthika ni akhale mwa hiyo. Nto waamini hiyo orinaahu ti wa—ti waamini wowiipithihiwa, ahiiso mutthu owiipithihiwa. Tivo hiyo khaninweha itthu

sinoon'ahu mw'ekuwo ela. Ekuwo yookhalana osoma, ni enniira itthu ni olavula itthu. Eyo etthu ya siyensiya. Masi Erooho ya Muluku mukumi enkhala muhina mu, enniihana itthu iye sahaakhanle, ntoko saakhanle, vakhala wira Muluku ohimmye siiso. Vo ti vari ekuwo. Hiyo nri mukuwoni.

⁶¹⁰ Vano, nihiku nimosa Owo onoohihimuxa ekuwo ela, kahi yooyariwa ni muthiyana mwaha w'otthuna wa ekhapa wa mulopwana ni muthiyana, masi mwaha wo otthuna wa Muluku Owo onoolavula ni eyo enimwiiraneya. Vano ninrowa okhalana erutthu ntoko erutthu Awe Yoowo yoovuwa. Hiyo ninrowa okhala owiipithihiwa, wira niweryeke olavula mmosa ni mukhw'awe, ovahanaka matata mmosa ni mukhw'awe.

⁶¹¹ Vano, naakhumaka nno, yookhala empa, eteyofaniya, elatarato ya mutthu paahi, ehinlya, ehnwurya, ehnrupa, enkhala yoovenya mahiku othene. Ti weiwo hiyo onrow'ahu. Masi awo anoowehererya vathi v'Altaari, ekhuwelaka, "Pwiya, mpakha liini? Mpakha liini?" wira ethikile vathi va. Okhala wira, awo antthuna ovahana matata mmosa ni mukhwaawe. Awo antthuna okilaathi ni olya, n'ulavula mmosa ni mukhwaawe. Awo atthu. Nittottopeliwe Nsina n'Apwiya!

⁶¹² Okathi Muluku ompankaawe mutthu ailattanihaka Yoowo Mwaneene wopaceryani, Owo aampanke siisa. Owo aanipatthana ni mmosa ni mukhwaawe, okhala wira ninnisuwelana. Sinninisivela itthu Muluku sinipanke-awe, okhala wira hiyo nipakiwe siisa. Mwa Orwa Wawe wuulupale, ale ari oolikana anrowa okhala siiso mahiku othene. Oohikhwa, ninrowa okhala mwa mukhalelo Awe. Oh, nttottopeliwe Nsina nlo na Kristu!

⁶¹³ Nto vano nookhalana neemexeryo no woopowa wahu, okhala wira ninnimukupali Yoowo okhala Moopoli ahu, okhala Mpenuxa ahu. Sothene iya itthuvelo, ahiiso, ikawanelo sinlinvwa osekuuruni. Amen. Nyuwo munnisuwela ele ekhanle esekuuru. Munooowerya okhalana ikawanelo mwa yeyo mpakha mureerelo w'ekekhai orwa. Vekekhai. Nyuwo munooowerya ophwanya ikawanelo. Nto hiyo nimphwanya ikawanelo vano. Emosa paahi, etthu ene, niphwanyakaru ikawanelo, etthuvo enimwaacerereya-tho.

⁶¹⁴ Namuteko mmosa a esekuuru, emaara emosa, aahikiirela, "Billy, kaaththuna kootumihiyereni esekuuru."

Miyo khwira, "Kookhalana emosa." Amwaar'aka khukiweha.

⁶¹⁵ Vano, hat'etthu ya nthowa ni esekuuru. Masi atthu akina arina "esekuuru voohaawa." Vano, awo khurukunuwa. Owo khwira . . .

⁶¹⁶ Amwaar'aka khukiweha, yootikiniha, "Nyuwo mookhalana esekuuru?"

⁶¹⁷ Miyo khwira, “Vekeekhai.” Awo kхиyaasuwela hat’etthu ya yeeyo.

⁶¹⁸ Owo khwira, “Ahe, Billy, muthinto xeeni wa esekuuru murin’anyu?”

⁶¹⁹ Miyo khwira:

Nroramelo woottottopeliwa, Yesu t’awaka!
Oh, opuha xeeni wa ovuwa w’eMuluku!
Murithi a woopowa, oothummwa ni Muluku,
Ooyeriwa ni Erooho Awe, oorapihiwa ni
Ephome Awe.

⁶²⁰ Owo khwira, “Eyo ti yooreera saana, Billy,” owo khwira, “masi eyo khenrowa woohelani nno mmahiye.”

⁶²¹ Miyo khwira, “Masi Eyo enookikumiha. Eyo t’itthu yuulupale.” Miyo nkivelavenle ni orowa iwe; Miyo kincaliwa moota wo okhuma.

⁶²² Nto okhala wira kookhalana nroramelo, mwaha wo olapha wa Muluku a Ehimalelo, wira Owo onookihihimuxa-tho kilikanaka ni Mwan’Awe, nihiku nookiserya, kinimweetta voohoova ni okhalana muhakalalihio ni nankura a munepa, wira, kikhala mukuwonu mu iwe yookhala Etthu ehhinooneya ekitthukwenle nankura Vamwala wa okathi iwe. Maasi yaavenyaka n’uruma, khivanvirikana hata vakhani. Onakhaleru okhwa, ihasara, wala etthu p’itthu, khennimwalaniha ni ophenta wa Muluku. Nankura aka onlipa muhina mwa ekuwo. Maasi asarye. Emane. Atthu ooohaamini arwe. Mulipa-oowaamini ooyeriwa vasya ookhalana nankura. Nyuwo khamunwerya woona mw’ekuwo ela nlelo. Masi koosuwela wira nankura aka t’olipa iwe Vamwala w’okathi, Yoowo omulamphe natiri wira Owo onookihihimuxa nihiku nookiserya.

⁶²³ Khivanxankiha nyuwo oweryaka oweha okhwa wiitho, ni wira, “Ori vai mpwino anyu? Mahiye, oxintta wanyu ori vayi? Masi nimuxukhuruku Muluku Yoowo onnivaha oxintta mwa Pwiy’ahu Yesu Kristu.”

Mwemmo *namahoola* . . .

Oh, wulu! Khaninrowa ophiyerya nisomi.

Mwemmo namahoola . . . wa hiyo

⁶²⁴ Namahoola. Mootoko oweha, mahiku a khalayi a onkela nsuwa (Imaara sinci-ene koovira miphito sa khalayi.), namahoola, wala mulipa-oohotta? Okathi ivakawu soottharana saapweteyaaya, mwaha wa maasi, mulipa-oohotta aathimakela ohoolo. Nto owo oonaka mahimo a aHindi; owo aanaavira. Ni owo aanoona vatthu vaari ephattuwelo ya maasi. Aanithikela ottuli aakuvaka wira omuleele mukhulupale a ivakawu soottharana, “Mwaakuvihe ikhavaloo, atthu othene ekhale oolipa murima, maana ovira mwaako iwe yookhala ephattuwelo yuulupale ya maasi.” Owo namahoola.

⁶²⁵ Nto va, Namahoola. Mutthu aahitoko ovariwa ni xetwani, vathi va mooro vowaakuva, masi Oookhala mutthu aaukunxe epuru ya kapwithi. Owo aari Yesu. Namahoola oorowa ohoo lo wahu. Nto Satana eemenle-ene vale ni ekapwithi, onikuttelalaka, kweekwe mw'epothani ni noovaka okhwa. Owo aawehaweha Ephattuwelo yeele. Vekeekhai, owo t'aryaawe. Owo aahivahiwa muteko, okhala wira hiyo naahittheka khoomoliwa wa Yeeyo. Masi Namahoola, Kristu, khukela khukuxa epuru.

⁶²⁶ Nyuwo muhiiwa nsipo nle na khalayi, "Nvarele ele ya ikuru, maana Miyo kinimoorwa"? Nvarele ele ya ikuru, hat'etthu; nrowe nikuxe yeeyo. Hiyo khaninthuna ovarela-tho. Kristu ookuxa ele ya ikuru. Aleluya! Mukhora woohuliwa. "Yookhala Ephattuwelo eththukuliwe mpaani mwa Muluku, mmuttettheni wa Davidi, wira ereerihe, wira oreerihwiwe ole ootakhala." Namahoola ahu oovolowa mwaha wa hiyo.

⁶²⁷ Namahoola, Owo onninihimeerya, "Nookhala nipuro nimosa iwe, ohoo lo, weiwo ohinrowaanyu okhalakhala muuluvalaka." Weiwo ohinrowa okhala-wo mannyaari, weiwo ohinrowaanyu omurumeela Max Factor wira ookhaliheni ntoko ooreerela wa aiy'anyu. Namahoola oorowa ohoo lo. Khanihiyo nipuro munuuluvalaanyu ni okhulumuwa ni oothukumela. Nipuro muhinrowaanyu okhalakhala nwereiwaka. Weiwo ttuuthu ohinrowaawe owereiwa mmirimani. Weiwo ohinrowaanyu okhalakhala mmoroxaka yoowootherya, ahiiso, niino, wira muhele noowootherya. Aleluya! Oh, ntottopeliwe Nsina Nawe! Owo oovolowa, nto oohikhwa ninoorowa weemela oolikana ni Yoowo, nihiku nlo iwe. Ittheneeri ni nsuwa sinooriipa. Vekeekhai. Namahoola ooroowa ohoo lo wahu.

... *Yesu oronwaawe, okenle-awe mwaha wa hiyo,
ntoko namahoola, okhala namukuttho muulupale a
mahiku othene ntoko oruma wa Melikhiseteki.*

⁶²⁸ Namahoola ola muulupale oorowa hiyo nihinatti, otthukula ephiro. Owo okhumme wa Erooho, iphattuwelo suulupale sa ekhweyi ya Muluku, Yoowo ahaarina epacerelo nnakhala emalelo. Owo kweekwe, aari, Muluku.

Nrayi nla na Waarya naahikhuma. Naari nrayi na mphento, nlo ti nle nuulupale, nooxeerya. Nikhwili ninrwa ninttharelana, nikhanle nooripelela; nooripelela, okekayi. Nikina, naatthara numala nlo yaari makhwili, mwa makhwili mathanu na manli ooloka, seyo sikhanle Irooho thanu na piili sa Muluku, sikhumm Ephattuwelo yeele yuulupale wala Tiyamante ole muulupale Yesu omuhimalyaawe. Tiyamante ole muulupale aahithikiliwa, wira ooniherye makhwili ala. Muluku aipanke erutthu khukhala ni hiyo, wira Owo ooniherye oreera Wawe murima ni omoriwa ikarari eriyari ahu, mwaha wa soovaha ni ithoonyeryo ni mitikiniho. Ekhweyi iyo yothene yuulupale yaahikhala Eteyofaniya, ya, yoopakiwa voollattana ntoko

mutthu, masi Owo nlelo khaari mutthu, Owo khaarina erutthu nlelo, Owo aari Eteyofaniya.

⁶²⁹ Moise iirale, “Kaananithuna kiwooneni Nyuwo.” Muluku khumwiipitihia muhina mwa mwala.

⁶³⁰ Nto okathi Owo oviraly’awe, Owo aahirukunuxa ettuli Awe. Moise khwira, “Yaakhala ntoko ettuli ya mutthu.”

⁶³¹ Vano exenei yiiraneiy? Nihiku nimosa iwe, okathi Abrahamu aakilaanthi-awe muheemani mw’awe. Hiyo ninoophiyerya yeeyo, ohiy’ula. Okathi Abrahamu aakilaanthi-awe muheemani mw’awe, Muluku aahirwa wa yoowo, mw’erutthuni ya ethayi.

“Oh,” nyuwo muniira, “Munna Branham, owo aari . . .”

⁶³² Ninoomphwanya Owo vaava va okumanaka ni Abrahamu eyo ehinathhi, ntoko Melikhiseteki, erutthu y’ethayi, yoowo aari Muluku. Vekeekhai, aari yoowo. Owo aari Muluku mw’erutthuni.

⁶³³ Nyuwo muniira, “Vano, Munna Branham, mwaha wa xeeni Owo aarow’awe othika khuyariwa?”

⁶³⁴ Owo khaayariwe okathi uwo. Owo aaroopattuxiwa paahi, erutthu Owo aakhalaawe-mo. Melikhiseteki aari Mwene a oSalemi, yoowo okhanle Mwene a oYerusalem, yoowo okhanle Mwene a murettele; yoowo ahaarina hata tiithi nnakhala maama, epacerelo ya mahiku wala emalelo y’ekumi.

Yesu aahikhalana oowanli tiithi ni maama, ni epacerelo ya mahiku ni emalelo y’ekumi. Masi Owo aakhalihiwe “ntoko” Melikhiseteki, yoowo ahaarina epacerelo ya mahiku wala emalelo y’ekumi.

⁶³⁵ Melikhiseteki aari Muluku Mwaneene. Melikhiseteki aari Yehova Muluku, Yoole aakumanne ni Abrahamu, miyaakha oholoo waya, oholoo wa eheema awe. Aarukunuxenle ettuli Awe wa yoowo; Owo khwira, “Saara otheyenleni?” Eyo ekeekhaii. Owo aari Ole eemenle vale, ovehaka oSotoma. Abrahamu aahimusuwela Owo, okhala wira muhina mwa ekuwo awe aahikhalana nankura aalipa ni natiri yoowo. Kahi mwaha wo wira owo aahikhalana moonelo mmosa, masi Muluku aammanenle natiri. Nto okathi owo okenly’awe okumana ni makineeti ile yuulupale, owo aahisuwela wira Eyo yaari mw’erutthuni mmwe.

⁶³⁶ Aaheetta ni Abrahamu, vale vakhani. Owo aahimuleela Abrahamu. Khwira, “Woonaka wira, Miyo kinoomwiipithiherya itthu iya Abrahamu, woonaka wira owo mulipa-oorithi elapo? Miyo nkiniira.” Tivo, “Abrahamu, kinimooleelani enrowaaka wira,” ninookelela yeeyo ohiyu yoola, “oSotoma wu,” ni etthu awo othene yaarow’aya wira. Nto Owo vaamanlyaaawe omureeriha Abrahamu, Owo aahithikela-tho weephakani. Mutthu eemenle vale ni aarina ntthupi mukuwoni Mwawe, Mutthu. Ni kahi yeeyo paahi, masi Owo aahikuura enama

ya mwaanyompe Abrahamu aaivalyaawe, ni aahiwurya eleethi ya enyompe, ni aahikhuura mikatthe (iphawu sa nakhuwo), ni saarina manteeka mwemmmo. Eyo ekeekhaii voolikana. Vano nto khutthikela-tho okhala Eteyofaniyya.

⁶³⁷ Yaari exeeni iyo? Owo ahaakuxenrye-ni iwe? Owo khaatonko oyariwa ntoko nyuwo ni miyo. Masi Owo aahaana oyariwa mw'erutthuni, wira Owo awerye ovarela mpwino owo. Ele yaari erutthu yoopattuxiwa. Ele yaari erutthu Owo aakunxaawe ekalsiyu ni epotaasiyu vatthayani, nto khwira, "Whish," khukela mwemmmo. Siiso taaryaawe Melikhiseteki. Owo aakenle mwa yoowo, mw'erutthuni Owo aakhanlyaawe weettaka ochoolo wawe vathi va ekuwo, va ekuwo ya yoopattuxiwa Awe Yoowo; kahi ekuwo yoopattuxiwa ya muthiyana, yoovira mmirimani mwa muthiyana, mwa—erukuruku, nnakhala. Masi Owo aapattunxe ela khukela-mo, khulavula, ntoko Melikhiseteki.

⁶³⁸ T'ani Melikisetekhi ula?

Okhala wira Melikhiseteki ula, mwene a oSalemi,
(yoowo okhanle Yerusalemu), mukhulupale a Muluku
a wirimu-rimu, (vekeekhai), aakumanne n'Abrahamu
okathi aahokolowaawe waawiivaawe mamwene, ni
khumureeriha;

Yoowo Abrahamu anvahalyaawe ya namuloko
ya itthu sothene; opacerya wene nnihimya Mwene
a exariya, (ophenta iwe wuulupale, Erooho ele
yuulupale wopaceryani)... Mwene a exariya,...
nuumala yeeyo... Mwene a oSalemi, yoowo okhanle,
Mwene a murettele;

Khaarina tiithi awe, hata maam'awe, khaarina nloko
nawe, khaarina hata opacerya wa mahiku, wala emalelo
yekumi;...

⁶³⁹ Aari pani? Owo khonayariweke, Owo khonkhalakhala okhwaaka. T'ani uwo? Aari Muluku, vekeekhai, aari yoowo, mwa eyooniheryo ya Pwiya Yesu. Vekeekhai aari yoowo. Masi Owo aahaana orwa aviraka mwa muthiyana, mwa enamuna emosaru nvinryaanyu mwa muthiyana. Ni Owo aahaana orwa enamuna murwiyaanyu, wira oohokoloxeryeni wa Yoowo. Aleluya!

Mahala oowunnuwexa! a Apwiya,
 Amooponle namuhaawi, oo hoona ootakhaliwa
 ntoko miyo!
 Miyo kaahitoko orimeela, masi vano
 koophwanyiwa, ni mahala Awe,
 Kaari oo hoona, masi vano kinnoona.

⁶⁴⁰ Kinnisuwela etthu Owo aarin'awe wira. Muluku aahikhala miyo, wira miyo mwa mahala kikhale a Yoowo. Owo ookuxa itampi saka, wira mwa exariya Awe miyo kiwerye okhalana Ekumi Ehinimala. Miyo nkaawerya wiithanla mmansaka. Mukhalelo aka waari wa natampi. Miyo nkaarina-vo ethu

mwa yeeyo. Miyo “kiyariwe molumwenkuni, oopakiwa mwa sootakhala, kirwiye mulaponi koothaka.” Hata oreeriwa, nnakhala; hat’etthu, hata otthuna.

⁶⁴¹ Muleele ekuluwe wira “yoovonya, olyaaka ntoku,” munimwiira? Moone sinto enoowiiwelelani. Mmuleele nakhuku wira owo “oovonya, okhuuraka nikarakasa nookhwa,” nto moone ethu onrow’awe wooleelani. Owo aawerya olavula, “Muxikhe mwaha anyu.” Vekeekhai.

⁶⁴² Oh, masi mahala a Muluku arukunxale mukhalelo ola, khukivaha oreeriwa wo otthuna ni otthunaxa ni ovoliwa ntthona, “Ophenta Wanyu wo oreera murima ti wooreeraxa wa miyo ovikana ekumi, O Muluku. Murim’aka onootthunaxani Nyuwo.”

⁶⁴³ David ohimmye wira, “Ntoko ethove enihaawelaaya miro sa maasi, siiso munepa aka onnivoliwa ntthona ni Nyuwo, O Muluku.”

⁶⁴⁴ Muluku oonvaha mutthu ovoliwa ntthona, wira omukokhoreleke Yoowo, wira amphenteke, omphavela Yoowo. Masi mutthu onoohonona eyo ni wiihana wa xetwani, nto owo onoorowa n’usiveliwa n’athiyana ni soopuha n’itthu sa molumwenkuni, ophavelaka osiveliha opattuxa iwe wooreera Muluku ohenly’awe muhina, wira amphenteke Yoowo. Owo onihelela itthu sa molumwenkuni. Masi, munna, owo arukunxiwaru, nto ephattuwelo eyo erina anamwiiniha mwiila mwemmo, inamuna sothene sa—sa evitikavitika sa esisterna, sookukutthiwa ni ahiiviwa axikokho, nto Maasi ooreera a Muluku khuheliwa mmwe, etampi khenikhalkhala eweryaka okwannya. Amen.

O moota onimphant’aka Yoowo! Moota
onimukokhorelaaka Yoowo!

Ekumi Aka, Nrayi naka na nsuwa, Othene mwa
Sothene!

Mpattuxa muulupale okhanle Moopoli aka,
Ni omalela wothene wa Muluku onkhala mwa
Yoowo.

Okhuma movuwani Mwawe, wahala ene a
mahiku othene,

Muluku aka ni Moopoli aahirwa, nto Yesu
naari Nsina Nawe.

Ooyariwa mwaalyela inama, mmalapo w’ale
Awawe,

Muluku a mixankiho, maithori ni oluwela.

O moota miyo onimphant’aka Yoowo! Moota
miyo onimukokhorelaaka Yoowo!

Iphumu saka, Nrayi naka na nsuwa, Othene
mwa Sothene!

⁶⁴⁵ O Muluku! Owo aawerya sayi wira? Mutthu oophavela olepa. Mmosa iirale:

Ephareya yothene yaari etinta,
 Khula nlaxi mulaponi nreka;
 Erimu yothene epaphelo,
 Ni khula mutthu namalepa oosuwela;
 Wira olepe ophenta wa Muluku osulu

Moota Muluku ole muulupale a Wirimu aakhanle-awe erutthu khukuxa itampi saka!

Wira olepe ophenta wa Muluku osulu
 Ephareya yaanvuua yuume;
 Wala epaphelo yoovilikiwa yaarina yothene,
 Yaataliwe-ene erimu n'erimu.

⁶⁴⁶ Ni waavaha nroromelo woolipa alipa-oorithi woopowa nno, Owo aahilaphela Mmansawe wira Owo aamunihihimuxa mahiku ookiserya, onivahé Ekumi Ehimala. “Ni khaavo onwerya waakumiha mmatatani Mwaka.” Amen.

Nivekele.

⁶⁴⁷ Munoottheka mwaha wo okhooatta mphento Awe? Murookhooatta Mukhalelo Awe wooreerihiwa, muulupale Ola ookhalinheni ele muryaanyu? Nto vano nyuwo muri va, voosiis'ula, mpakha va mw'ekumi ila, ni ennoovahani okathi. Munnitthuna otthikela mukhalaka? Eri enamuna emosa paahi y'okhala mukumi, iwo ti omwaamini Pwiya Yesu. Nyuwo, mmurimani mwanyu, mwaaminiru wira Owo Mwaana a Muluku ni omukupali Yoowo okhala Moopoli anyu, ni waamini wira Muluku oomuhihimuxa Yoowo wira mukhalihiiwe naxariya, mwatthuna vale waakhela ni mulipiheryo yoowo, ti wawinyu vano.

⁶⁴⁸ Munnitthuna ovenxa ntata? Wookhala munepa ohirkunkxale murima, waatthuna orukunxa murima voosiis'ula, wira, “Mukuupuwele, munna, mulaleyi, okathi onrow'ahu ovekela. Nave-tho koovonya. Kihitakanxa mukereja, masi miyo—miyo koosuwela wira nki—nkinatoko okhalana eyo enihimyaanyu. Miyo nkinatoko oyariwa ni Erooho yeeyo, Munna Branham. Miyo paahi—miyo nkirina Eyo, ti yeeyo tu. Kintthuna wira mukivekele, wira Muluku okivahé voosiis'ula.” Muluku ooreeriheni, mulopwana. Aamukhala mukina? Mwiire, “Muluku, mukikhalihe ele Nyuwo munthun’anyu wira kikhale. Kintthuna wira Nyuwo mukhale... Miyo kintthuna kikhale ntoko Nyuwo sintthun’anyu wira kikhale. Miyo kookhooatta ophenta Wanyu.” Muluku ooreeriheni, mwan’aka.

⁶⁴⁹ Okathi vakhani paahi vano.

Ephareya yothene yaari etinta,
 Ni erimu yothene epaphelo;
 Khula mutathi mulaponi waari mureka,
 Ni khula mutthu namalepa oosuwela;
 Wira olepe ophenta wa Muluku osulu
 Ephareya yaanvuuva yuume;
 Wala epaphelo yoovitikiwa yaarina yothene,
 Yaataliwe-ene erimu n'erimu.

Oh, ophenta wa Muluku, wuulupale ni
 wooloka!
 Woohithokoseya ni wa ikuru!
 Onookhala mahiku othene,
 Nsipo n'atthu oowaarya ni Malaikha.

⁶⁵⁰ Muluku Ootthuneya, vekeekhai mulipa-oolepa olempemoolumo awo aari ntoko anci-ene wa alipa-oowaamini Anyu, ophavelaka, otthunaka ophwanya moolumo wira ohimye yeeyo. Ni yoolempwa mBibiliani, “Soowaatta, okhala wira mulaleyi aari musuweli, owo aahiphavela olokiha moolumo manci-ene.” Oh, moota naarowaahu ophenta okhalana nlumi ni nuulumo naakhanlyaaahu waaleeliherya atthu ele ekhanle vekeekhai, masi khinaaweryaneya ophwanyiwa muyanoni sinookhwa. Ehimalelo yothene, voohihoverya vakhala wira enoosuweiha, moota Muluku a Wirimu orwiyyaawe mulaponi wira owoopole anatampi oohaawa, oopweteya, ootakhaliwa.

⁶⁵¹ Miyo kinoovekelani Nyuwo, Tithi, wira mwa moolumo alavakhani oohimmwa, ahiiso oohihimmwa oratta-ene voosiis'ula, kaatthunaaka ohimya, wira mutthu oophwanya murettele ni esiveliheryo ni elipiheryo ya ikuru, yoowo oronwe nipuro nootthyawela. Ni wira munep'aya olipe ni nankura mwa natiri yoowo Muluku omulamphe-awe, wira Owo aamwaahihimuxa nihiku nookiserya. Matata manci-ene aavenxiwa, mpaani mu, mutapernakulu muumu. Muluku, mwaavahe nroromelo ole woolipa, naanaano va. Awo elipe ni nankura Vamwala wa okathi. Hata wira ephareya enttikinyeya sayi vootakhala ni miyaatiya sayi sikhaani otupha, awo aakhalana nankura, natiri a Muluku. Awo ekhale vaavo, “Muluku oohimya Eyo. Owo khokhanle woothaka.”

⁶⁵² “Ole oniiwa Masu Aka,” yaawo kiphavenlyaaka olaleya voosiis'ula, “ni onimwaamini Ole okirumme, Yehova, ookhalana Ekumi ehinimala; ni khonrowa olamuliwa, masi oovira mookhwaani khuphwanya Ekumi.”

⁶⁵³ O Ole Ohinimala, mwaareerihe awo olelo. Ni wira khula mutthu mu ohikhanle vathi v'Ephome, munep'aya ohinatoko orukunxiwa, yiiraneye naanaano va, Pwiya. Nyuwo mpake mwiiriirya. Yothene ti Yawinyu. Enivahererwa wa Nyuwo. Kinvekela wira Nyuwo mwaavahe eyo, Ekumi Ehinimala. Wira, nihiku nimosa, ekhopela ekina ya muro, okathi mmosa-mmosa

hiyo onviraahu mukhatoni, nikumane iwe weiwo awo nnakhala ahinrowaaya-tho wira “kwaherini”.

Nihiku nlo ninoophiya omuratthini
woomalelani wo okathi,
Miyuupuwelo sookiserya sa mixankiho
sironwe;
Onookhala Mutthu olipelelaka onrowa
onooniherya ephiro,
Nkinrowa omulapuwa Yordani meekh'aka.
Onookhala Mmosa, Mutthu onrowa olipelelaka
onrowa okooniha ephiro,
Nkinrowa omulapuwa Yordani . . .

⁶⁵⁴ Othene ale arina nroromelo yoowo, nvenxe ntata vano nvenxaka muru.

Miyo nkirina . . .

Vano mmukokhorele Yoowo paahi. Mutthaka woomala. Khamutteeliwe murima? Muluku oolapha wira Owo khaarowa . . . Muluku oolapha wira Owo aamurowa okumana ni nyuwo iwe.

Yesu okhwiye wira attipihe itampi saka
sothene;
Okathi epiphi miyo . . . (Nyuko munihimyani?
Mpwino woorowa.) Owo onrowa
okilipelelaka miyo,
Nkinrowa omulapuwa Yordani meekh'aka.
Imara sinci-ene kinninyanyaliwa, ni
ookhulumuwa . . .

Mmukokhorele Yoowo vano.

. . . enikhala ntoko apatthani aka othene
aarowa;

Nyuko yootoko woophwanyani yeeyo?

Masi wookhala muupuwelo onikihakalalih . . .
(Exeeni aari natiri?) . . . ontteeliha
murim'aka,
Nkinrowa omulapuwa Yordani . . .

⁶⁵⁵ Vano, aana a natiri, mmukokhorele mwaha wa Owo wira.

Nkinrowa omulapuwa Yordani meekh'aka,
Yesu okhwiye wira attipihe itampi saka
sothene;

Exeeni eniiraneya vano?

Okathi onoonaaka epiphi, Owo onrowa okhala
okilipelelaka,
Nkinrowa omulapuwa Yordani meekh'aka.
Kaphiyaru omuro . . .

Khula mmosa a nyuwo onoophiya. Yookhala eruku yuulupale, yooriipa eri oholo wanyu. Owo mukhora muulupale. Nyuwo munoovolowa mmwe, nihiku nlo, khino nihiku nla nihinatthi omala, khino ekereja ehinatthi owaliwa voosiis'ula. Munooovolowa mmwe. Khula okathi murima ommanaaya, muri nivalo nimosa vakhiviru.

Masi okathi onoonaaka epiphi, Owo onrowa
okhala olipelelaka iwe,

Owo ohimmye wira aamukhala. Owo oolapha wira aamwiira.

Nto nkinrowa omulapuwa Yordani meekh'aka.

⁶⁵⁶ O Apwiya Oottottopeliwa, mirima sahu ti soosareya, voosiis'ula, mpakha sintekhumaaya.

⁶⁵⁷ Wuupuwela otthimaka murima waamalaka, nto nfurumeera onahelela musawu muru anyu. Ni matata anyu, muhiweryaka ottikinya-tho. Matata anyu aryeene ntoko exeelo. An'inyu, amey'anyu, oophentiwa anyu anookhuvwela ni yinlaka. Mukhora ole muulupale onootthukuwa, iwe. Owo onrowa olipelelaka.

⁶⁵⁸ David ohimmye wira, "Miyo kahela olili aka wookhwaani, Owo onookhala weiwo." Nkinrowa olapuwa meekhaaka. Okathi okame wa mmurathini ompaceryaaya omwareela wiitho wahu, Muluku onookuxa mwaatiya wa ekumi, onihoole mpakha olapuwa. Owo aahihimya wira aamwiira. Davidi profeta oohimya, "Ayo, hata kaavira mukhatoni wa muuttutthi wa mookhwaani, miyo nkinrowa woova ethtu. Nyuwo muri ni miyo. Ttootto Anyu ni ekopo Anyu, sinnikikurunuxa murima."

⁶⁵⁹ Pwiya, hiyo khinreere otteeliwa murima olelo, okelihwa ntoko alipa-oomurithi natiri. Olelo nookhalana mwa hiyo Ekumi Ehinimala, okhala wira ninnimphenta Pwiya Yesu ni noomwaamini Yoowo, ni nookupali Masu Awe ni mwiixitthi Awe. Ni Owo oonivaha, ntoko ekanyeryo yo waamini wahu, Erooho Yoowaarya, ekanyeryo ya Erooho Yoowaarya. Waamini wahu mwa hiyo ti woolipihwa ni nankura. Nto ninaamwi imaara sinci-ene niviraka mwa iruku sooriipela, imaara sinci-ene hiyo ninniikwattula mphironi, masi nankura ahu nlelo onnilipa. Yookhala ethtu mwa yeeyo, ottaiwene iwe, enkhala ntoko weettiherya oholo, yiiraka, "Rowakan oholo. Hiyo ninookelela oholo."

⁶⁶⁰ Muluku, munireerihe. Hiyo ninnophavelani Nyuwo. Munikhalihe ooromeleya okathi wothene ni a ekeekhai mpakha okathi Nyuwo onnirweelaanyu, hiyo nnimootttopelani moovirani w'okathi ohinimala. Nto nihiku nenlo okathi oneemelaahu mulaponi...Inawo Sawe sooreerihiwa khasinakwannyelalo nlelo. Owo onrowa weemela iwe, osulu; nto masantu ni oovuluxiwa a okathi wothene, mwa khula owehererya, woopacerya, wa neenli, wa neeraru, wa neexexe, wa neethanu, wa neethanu na mosa, ni wa neethanu

neenli, othene yeemenle iwe ewanre-ene exariya Awe; hiyo ninrowa onwariha Owo ekhilempa Mwene a mamwene ni Pwiya a mapwiya, ni owiipa a wahala ale a ovuluxiwa. Mirima sahu soohaawaseya sinoorowa othukumela okathi oninwehaahu Ole oniphentale ni khwiivaha Mmansawe mwaha wa hiyo. Okathi waaryaaahu anatampi oohiphenteya, Kristu ohookhwa wira hiyo noopowe. Hiyo ninnooxukhuruni Nyuwo mwaha wa yeeyo, Tithi, mwa Nsina na Kristu. Amen.

⁶⁶¹ Munnimphenta Yoowo? Oh, moota Owo ory'awe eekeekhai. Khamunoona ntoko wira mwaanithuna mwa enamuna emosa ompatikha Yoowo? Khivaarowa woosivelani opuruleya ni okwannya inawo Sawe, moosuwela?

⁶⁶² Moosuwela, yaahikhala atthu kamosa-kamosa yaarwaaka mmitekoni mwaka s'okokhorela oPhoenix, Arizona, yaaira, "Kaathuna kilavule yeeyo ni Yoowo. Kaanithuna ohimya wira, 'Pwiya, Nyuwo mookiphenta okathi ephiro aka yaaryaaya yooriipelaxa.'" Miyo waanikisivela olavula ni Yoowo nihinatthi olapuwa. Miyo—miyo kintthuna kimoone Yoowo. Miyo—miyo—miyo kintthuna kimoone Yoowo paahi. Wuupuwela moota onrowaaka wooma, moota murim'aka woohaawa onrowaaya otupha kamoonaru Owo eemenle iwe.

⁶⁶³ Imaara sinci-ene kinnupuwela, "Miyo kaanithuna kliwale-ene Nsu nle wira, 'Murwe wa Miyo, nyuwo othene mulemeliweni ni muhaaxiwe. Miyo kinimoomumulihani.'"

⁶⁶⁴ Miyo alakela nkinrowa wiwa v'ekekhai siiso ntoko Owo saalavunlyaaawe okathi ule, masi kintthuna kimwiwiwe Owo wira, "Nla nihiku nookiserya. Vaareera siiso, murumeyi Aka oorumeya ni oororomeleya, vano volowani moopuhani mw'Apwiya mutthokiheriw'anyu." Okhuma liini?

⁶⁶⁵ "Okhuma okathi mooponwe-anyu?" Nnari, munna.

⁶⁶⁶ "Okhuma opattuxiwakaru olumwenku, okathi Miyo waawoonalyaakan ni koosuwelani khalayi ene, ni kootthokiheryani Ekumi Ehimala," nyuwo mwaahireerihiwa nto. "Othene ale Owo aasuweleny'awe khalayi ene, Owo oowiihana." Eyo ekekhai? "Othene ale Owo owiihan'awe, Owo ohaakkaliha anaxariya. Ale Owo aakkhalinh'awe anaxariya, ohaavuwiha." Eyo eri vo. Owo onisuwenle khalayi ene, khuniihana, khunikhalihia anaxariya, nto hiyo noovuwihiwa vamosa ni Yoowo, woomalelani wa olumwenku, nirowelaka ethuvo ahu. Khamunteeliwa murima? Vekekhai, yaamuwiirihani nyuwo omphenta Yoowo. Okathi mwahaaweryaanyu wiikhaliherya, nto va Owo khurwa khuiirelani.

⁶⁶⁷ *Noottottopeliwa Nikhale Nlutte Nintthuka*, Munna Gertie. "Mirima sahu mwa ophenta w'oKristu," niringene-ene epathanelo ela yaamukhaani y'okokhorela va vano, nto ninrowa waavekelela aretta. Muluku ooreeriheni. Nyuwo munvenxenrye

matata Kristu voosiis'ula, mphwanye nipuro n'okokhorela-vo, mmurumeele Yoowo.

⁶⁶⁸ Vano, nrowe nimukokhorele Yoowo vano, ntoko muthukumano, nyuwo aMetotista othene, ekereja ya Muluku, Asempeleya a Muluku, maPrespiteriyano, aLuterano, aKatolika. Othene vamosa vano, nrowe niipe vano.

Noottottopeliwa nikhale nlutte ninthuka
Mirima sahu mophentani w'oKristu;
Opatthana wa muupuwelo mmosa
Ori ntoko ole Osulu.

Ohoolo wa Ehice y'Atithi ahu,
Ninniroha nivekelo nahu voowiilipiha;
Woova wahu, nroromelo ahu, otthuna wahu siri
imosaru,
Ohakalala wahu ni ovela-vela wahu.

Naavalaanaka,
Eyo enniniwereiha muhina;
Masi nlelo ninookhala vamosa mwa...
(aMetotista akavi, aPatista, ni othene?)
Ni niwehereryaka okumana-tho.

⁶⁶⁹ Eyo kheniwoonihani oreera? Nrowe nirukunuwe ni nivahane matata mmosa ni mukhw'awe vano, niipaka-tho yeeyo.

Nihinathi...

Nvahane matata, mutthu mmosa ottuli wanyu, ohoolo wanyu, khula epanitte.

...Veehiceni,
Ninniroha nivekelo nahu voowiilipiha;
Ohakalala wahu ni ovela-vela wahu.

Vano naavalaanaka,

Ninoophentana mmosa ni mukhw'awe.

Eyo ennivaha...

Mwaanitthuna muteko otthikenle? Munnona? Ti siiso ninuupuwelaahu.

...owereiha muhina;
Masi hiyo ninookhala vamosa mmurimani,
(mwa mmosa)
Ni niwehereryaka okumana-tho.

Waahikhale-tho wenno, Nihiku nle nuulupale ninookumana.

⁶⁷⁰ Vano, Tithi, mwaakhele okokhorela wahu voosiis'ula. Mukuxe Masu ni mphatteye Yaawo mmurimani mw'alipa-oowaamini. Wira awo ehiveveleiheweke, nto osulu olelo nto vathi meelo, masi wira Masu ala ephwanye nipuro naya noomumula mmurimani mwa khula mulipa-oowaamini. Osuwela ela, wira, "Muluku oolapha ni elaphelo, ni sookhala itthu piili

soohivirikanyeya. Ohivirikanyeya wa Muluku, eyo ti, wira ti yoohiweryaneya Owo wootha, wira alipa-oorithi woopowa nno ewerye okhalana nroromelo ola wa ikuru, wookhomaala ni w'ekkeekhai, nankura mmunepani.” Osuwela ela, wira, “Muluku oonilaiherya, mwaataano wo olapha. Emosa, wira Owo khokhanle woothaka; ekina, Owo oolapha elaphelo vasulu vaya, wira Owo onoonivenxa nihiku nookiserya ni onivaha Ekumi Ehinimala.” Nisuwelaka, wira, “Vamanlyahu wiihaniwa, wira Owo ohimmye wira onisuwenle ohinathhi opattuxiwa olumwenku, ni ooniththoma okhuma khalayi wira nikhale aana mwa Yesu Kristu. Ni Owo oonisuwela khalayi-ene. Owo ooniihana. Nto okathi Owo oniihanne-awe, oonikhaliha anaxariya.” Hiyo khaninweya wiikhaliha anaxariya mmansihu, tivo Owo oonikhaliha anaxariya mwaha wo okhwa wa Mwan’Awe. “Ale Owo aakhalinh’awe anaxariya, Owo ohaavuwiha.” Masu aalavuliwa. Nto hiyo nnimweetta paahi, nirowaka, nitthapaka nirowaka Movuwani.

⁶⁷¹ Mwaavahe atthu waamini, ni mihapo iye sikhani n’ithu sinaapharelela atthu, wira awo yiitathe seiyo, voosiis’ula, ni Masu ala a Muluku yaawo akhanle nankura a munepa, oolipa ni ooromeleya. Awo yiitathe mihapo saya, iviruwelo saya sikhaani. Ni ithu sinikhala...Ntoko Paulo sihimaly’awe, epantte yoottharelana ya mutthaka mahiku vakhani, “Nihiyе ithu sothene sinnittiyelela, ni etampi ennirukurerya vookhwuya, wira nitthimakele ni ovilela muteko oheliwe oholo wahu; ninwehexexaka mulipa-oopacerya ni oomaliherya waamini wahu, Yesu Kristu, Yoowo aattehattehiwe mwa inamuna sothene ntoko hiyo, nave oohikhala etampi.” Owo aahitthuniherya ottehattehiwa, masi Owo khaaivaherenrye ottehattehiwa. Ni hiyo ninnittehattehiwa wira etampi, masi nnakhala ohiivahererya. Okhala wira Ekumi eri mwa hiyo ti nankura a ekiseryo ahu Yoohimala, ni ninniphenta eyo ntoko yooreerihiwa ya murima ahu.

⁶⁷² Vano, aakhala anci-ene Satana aahaaxalyaawe ni mixankiho. Hiyo nnimwiiththokiha wira naavekelele, Tithi. Wira awo, okathi anivir’aya vathi va Masu a Muluku olelo... Masu awo ooreeraxa alaleiwe, Bibilia okhalaleka onamoona, Malaikha a Muluku yeemenle-ene vakhiviru, ni Erooho Yoowaarya yuulupale, vasulu va sothene, yeemenle va wira ekhalele onamoona Masu. Vano, Tithi, okathi awo anivir’aya vathi va Masu a natiri, voosiis’ula, awo akhume va wira ekhale akumi. Wira ehiye ikaruma saya sa metto, ehiye ikhatera ni—ni marepa yimmaathalaaya-mo, ekhale akumi paahi. Munivahe, Pwiya. Wira awo atthike muteko onththarelana awo anweryaaya orwa, wala ikereja saya, ehakalalaka, yooniheryaka ithu suulupale Kristu siiraly’awe. Hiyo ninrumeela wa ovuwa wanyu, mwa Nsina na Yesu. Amen.

⁶⁷³ Kihaana oveka muswammaha mwaha wa natiri ommanne-aka, wira voosiis'ula naamukela kapiitulu 7, masi nkiphiyenrye. Ni nihaana ohiya okathi vakhani va mwaha wa—wa yeela, wa eliinya ya mavekelo. Nto vano, ohiy'ula, Apwiya yaththuna vale, ninrowa okuxa kapiitulu 7, nisuwele T'ani aari Melikisetekhi ula. Akavi yaatthuna osuwela? Oh, ninrowa olukama okela mwa Yoowo, ninoosuwela oratteene wira Owo ti Pani. Ni Yoolempwa ennihimya wira Owo ti Pani. Munnona?

⁶⁷⁴ Ni Scofield ohimmye wira waari “onamukuttho.” Vaaaweryaneya sayi okhala onamukuttho, ohikhalanne epacerelo wala emalelo? Moone, kхиwaari onamukuttho. Aari Mutthu, Melikhiseteki (Nsina), Mutthu.

⁶⁷⁵ Ntoko, kahi wo ohaattittihi, masi Siyensiya a oKristu onihimya wira Erooho Yoowaarya “muupuwelo.” Ni Bibilia ohimmye wira, “Owo, Erooho Yoowaarya.” Ni Owo ti epronoome ya mutthu. Ti Mutthu; kahi muupuwelo. Ti Mutthu. Vekeekhai.

⁶⁷⁶ Nto Melikhiseteki ti Mutthu, Mutthu Yoole ahaarina epacerelo ya mahiku wala emalelo ya miyaakha. Owo khaarina hata tiithi nnakhala maama, wala osuulu. Ni hiyo ninoosuwela Owo ti Pani, Apwiya yaththuna vale, olelo ohiyu, ni Masu. Munniphenta Yaawo? Oh! “Masu Anyu muthuko mphironi mwaka ni inawu saka.” Oh!

⁶⁷⁷ Vano, nyuwo muniira, “Munna Branham, miyo nkinsuwela yoenthene Eyo.” Nnakhala miyo.

⁶⁷⁸ Masi, emaara emosa, miyo kaalaleya oKentucky. Ni wa anamurwa naanaano, ni aKatolika ni oohiyana-hiyana, ale khino ahinsuwela saana moota siryaaya itthu iya, soowiixerya ni soowaatta sa Soolempwa. Miyo kaalaleya mwaha w'ovoniha wa Muluku. Mwaarusi mmosa oohiwara ixapattho khuruuha... Owo khaarina miyaakha muloko ni mithanu, aahikhalan ttuutthu mmosa, aari oosupiwa. Miyo khwira, “Exeeni ennimwiira, munna, mwan’inyu?”

⁶⁷⁹ Khwira, “Owo orina ettettemeri.” Owo khaasuwela etthu yo ohimya, oosupiwa. Owo khaasuwela wiihana.

⁶⁸⁰ Mwaamukhaani alakela khaatonko okhalana ephara emosa ya ixapattho, ookhalaru. Oophentiwa a mulopwana mmosa, maihi oorakama emorelaka vathi. Miyo khwira, “Munnaamini?”

⁶⁸¹ Nto maitho ale makhaani, oottweeela khukiweha. Owo khwira, “Ayo, mulopwana. Vekeekhai kinnaamini.”

⁶⁸² Miyo kimukuxa ttuutthu mwaamukhaani. Nto okathi waanvekelelaaka, owo khuhiya othukumelasa. Uh-huh. Vano owo khukhuma, khukhuma.

⁶⁸³ Mmeelonu mwaya, kaaxaya ikhopa, okerekhere wa mwaako. Miyo khumwiiwa mulopwana mmosa okilaathe-ene vale olavulaka, saro thi a khalayi orumaka. Nto miyo khwaattamela ni mwiitiho. Miyo kaaxaya ikhopa. Awo yaakilavula miyo,

ekilaanthe vale, emulyaka soona ni esenyaka, makukhu eveveleyaka, *saale*. Nto awo yaalavula mwaha wa, vano, mwaha wa muthukumano ohiyu waavinre. Mmosa aya khwira, “Miyo koomoona mwan’owo. Miyo koovira weiwe, voosiis’ula. Owo khontthukumelasa, voosiisu yoola.” Munnona? Khwira, “Eyo yaari ekekhai.” Nto owo aamusenya.

⁶⁸⁴ Ni yaahikhalanasa irifle siphitenrye mwiri, vano miyo kuupuwela wira vaareerela kiisuwelih. Moosuwela, awo aakhalanasa manyakunyaku iwe, nave. Tivo, miyo khwaattamel. Miyo khwira, “Mooxeleliwa, axinna.”

⁶⁸⁵ Mutthu ule muulupale a erutthu, aakhala ntoko aamulavula, owo aahikhala soona vakhani mwaano, ntoko *siso*, owiihimyaxa *so*, ni exiko, yuulupale yoarakama. Ni aahiwara exapheyo yuulupale ya khalayi, yaakhuneela owiitho wawe. Owo khuwehaweha khukoona. Owo khookola moono khukuxa exapheyo ele, khurula, khwira *khwiro*, khummiryा soona ole aamunyamunyaawe, khwira, “Mooxeleliwa, pastore.” Munnona? Ayo, mulopwana. Nttittimiho. Nto eyo ti yooreera. Moota owo ophiyenryaaawe ovuluwa, miyo nkisuwenle, masi owo ookhala.

⁶⁸⁶ Vano, ohiyu woottharelana, kitthikaka, aahikhala mulopwana mmosa iwe aatthuna ovaanyihana ni miyo vakhani. Owo aaronwe ekereja yahaamini ovoniha wa Muluku. Tivo, ela yaari ekereja Metotista, White Hill, Kentucky. Vano owo—owo khurowa o... Owo aarimweemela vate. Owo aahikhala muthuko mmatatani mw’awe. Nto owo khwira, “Kinthuna kihimye ethu, mulaleyi. Nkinwerya okupali Yeeyo, okhala wira nkinwerya woona Eyo.”

⁶⁸⁷ Miyo khwira, “Nyubo khamunwerya woona Eyo?”

⁶⁸⁸ Owo khwira, “Nnari.” Khwira, “Miyo ka mutthu kinwereiwa, yoomi. Masi,” khwira, “Nkinwerya woona Eyo.”

Miyo khwira, “Munkhala woowi?”

Owo khwira, “Wu oBig Renox.”

Miyo khwira, “Ahe, munrowa ophiya sayi owaani?”

Owo khwira, “Ahe, kinrowa keettaka owaani.”

Miyo khwira, “Munniwerya woona owannyu?”

Owo khwira, “Nnari, mulopwana.”

Miyo khwira, “Khereere epiphi ohiy’ula, ti wa mahittette.”

Owo khwira, “Ayo.”

Miyo khwira, “Munrowa sayi owaani?”

Owo khwira, “Ni muthuko ola.”

Miyo khwira, “Muthuko khommwaleela ephiro yothene y’owaani.” Miyo khwira, “Munrowa sayi?”

Owo khwira, “Oh, miyo kineetta vakhiviru ni muthuko.”

⁶⁸⁹ Miyo khwira, “Ti yeeyo. Nyuwo mookhalana waarya wa muthuko vano, ni khula okathi mumpakaanyu nivalo epant’ila nno, waarya onoowooniheranyi eri oholo wanyu. Nyuwo mwatthikelaru mweettaka paahi, waarya onootthikela orowaka ni nyuwo.”

⁶⁹⁰ Ni nyuwo mwiire siiso voosiis’ula, mwaamutthunaka Kristu, Namukuttho Muulupale, Mulipa-oolapela mwaha wa eretta anyu, wala ikwerere sanyu, wala munep’anyu. Khino nyuwo khamunsuwela saana Eyo. Hiyo khaninsuwela. Masi hiyo ninrummwa “Weetta moWaaryani ntoko Owo siry’awe moWaaryani.” Nyuwo mookole nivalo nimosa moWaaryani. Nto mwakuxa Waarya ni nyuwo, Waarya onoomwaleela mpakha nihiku nooloka. Onoomwaleela ephiro oholo wanyu.

Nto ninrowa weetta ephiro ela yuulupale ya
khalayi,
Kihimyaka mapuro othene onrow’aka,
Kinamputi okhala muKristu a khalayi, Pwiya,
Ovikana etthu p’itthu ensuwel’aka.

Mootoko wiiwa nsipo nlo na khalayi?

Khiivo etthu ntoko muKristu a khalayi,
Wooniherya mphento w’oKristu;
Hiyo nneetta ephiro yuulupale ya khalayi,
Nihimyaka mapuro othene onrow’ahu,
Kinamputi okhala muKristu a khalayi, Pwiya,
Ovikana etthu p’itthu ensuwel’aka.

⁶⁹¹ Miyo okisivela. Vaareera. Vano ninrowa waavekelela arettta. Hiyo khanihiy... Hiyo khaninihimya wira ninniwerya waavoniha arettta. Naahimmyeru, naamuhimya etthu yoovonyeaya. Khula mutthu onwerekwa mu oovonihiwa. Ti yeeyo Yoolempwa ehimmy’aya. “Makhwatta Awe t’anivoninhe.” Eyo ekeekhaii?

⁶⁹² Khula natampi ori mu, vairaneya wira ookhala mmosa, nyuwo muhoopoliwa okhuma okathi Yesu okhwiyaawe. Masi muhiphiyerye okhwa va vaavo oreeriwa wanyu oheleliwaaya oholo wanyu, wira murowe Oholo Wawe ni mphavele waakhela Yeeyo. Eyo ti ya naanaano. Naanaano va nyuwo muhaana okupali Yeeyo. Mwarowaru ovikana Ephome, vano khamuhiy etthu woohikhala... Nyuwo moolamuliwa, okhala wira munlamuliwa mwa enamuna mweettihalyaanyu Etipiheryo ya Pwiya Yesu Kristu. Munnona? Nyuwo mwa... yeenyu muniilamula vaavo.

⁶⁹³ “Tivo Owo ohaaxeriwe soottheka sahu, ni makhwatta Awe t’anivoninhe.” Tivo, khiivo etthu kaarow’aka okhalana, wira koovoniheni. Khiivo etthu ekereja yaarow’aya okhalana, wira yoovoniheni. Etthu emosa paahi enwery’ahu ovekelela t’ila, wira waamini wanyu ohivonye, wira nyuwo murwe waltaari voosiis’ula omukupali Kristu okhala Mpenuxa anyu, siiso nyuwo

mwiiralyaanyu ntoko Moopoli anyu. Ni woohikhala hata... Muluku onnipaka miiriiry. Owo onnooniherya ethoonyero yuulupale. Oohoona, oohiiwa, oohilavula, sothene, annivonihiwa vaava otapernakulu. Masi hata yairaneywa wala nnari, hiyo ninnikupali Eyo, khula enamuna. Imaara sinci-ene itthu iyo sinkhala ni soowonna.

⁶⁹⁴ Akavi yaari vaava voophiyaka Ittiminku tthaaru sivinre, wala xexe, okathi mulopwana aavolonwaawe mu, oohoona ni oorakala, kireke aakilaantthe vakhaterani ohirina mutika wa olipa-lipa? Nto kihinatthi okhuma owaani, kaahimoona mwa yoowonna, "Wira aamukhala mulopwana mmosa iwe, a maihi ooriipa, ekhalaka oottweeela. Amwaar'awe muthiyana ooreerela, a miyaakha soophiyaka miloko mithanu na mosa. Awo animoorwa ni anrowa okhala yinlaka," ni awo anookivekela. "Ni kitthika ni kaavekelela aiy'awe." Owo aakilaantthe vaavale vale.

⁶⁹⁵ Nto miyo khurwa. Miyo khwaahimeerya axinna aka kamosa-kamosa va, "Nkawehani ela."

⁶⁹⁶ Nto okathi oronwaahu waltaari, akina yaahivekela. Okathi onrowaaka ovekela, keetta naananoru kitthikela va. Nto amwaar'awe khuvenya khurwa siiso ntoko Apwiya yaahimmy'aya wira yaamukhala. Atthu avehaka, wira yoone vakhala wira yaamukhumelela siiso. Khenavonyeyeke. Nto siiso okathi weettalyaawe...

⁶⁹⁷ Kiphiyerya osuwela, wira mulopwana mmosa, Dr. Ackerman, oBirdseye wu, Indiana, aari yoowo amurumme nno; yoowo okhanle muKatolika, ni mwan'awe phaatiri omosteero wu oSaint Meinrad. Ni Dr. Ackerman mwaapara aka a wooxayani, nto owo t'amurumme mulopwan'ovo nno. Nto Apwiya khukooniha mulopwana mmosa ooriipa maihi aarowa omuruma, masi miyo nkaasuwela aari pani.

⁶⁹⁸ Miyo khwira, "Owo ti Dr. Ackerman?"

⁶⁹⁹ Owo khwira, "Yaari yeeyo." Munnona? Vano nto mulopwan'ovo...

⁷⁰⁰ Miyo khwira, "Eyo ti SIISO ANIHIMYA T'APWIYA." Khurowa mpakha vaavo. Miyo khwira, "Mulopwana, nvenye." Oohoona ni khaawerya...owo...Mu—mutika wa olipa-lipa waahimalamala. Owo khaawerya wiilipiherya eemenle siiso. Munnona? Aari siiso mwa miyaakha, aahikhala okliinika Mayo ni khula nipuro. Nto khunvekelela paahi, khunvenxa. Owo khurowa, eettaka.

⁷⁰¹ Yoopacerya owo khwira, "Nkinwerya owoonani." Vano owo khukhuwela, "Ayo. Kinniwersa." Maitho awe khutthukuwa vaavale, owo oryeene Ortotookisa, amwar'awe, Prespiteriyaano.

⁷⁰² Atthu kamosa-kamosa anuupuwela wira "aPrespiteriyaano khankhuwela, ni Ortotookisa." Nyuwo mwaahaana owiiwa yaawo. Vekeekhai. Awo yaamukhuwela ni opatikhana mmosa

ni mukhwaawe. Khutthika khukuxa ekhatera awe ya iroota, khukhuma eettaka okhuruwelaka ixikatta, voolikana ntoko khula mutthu, aaniwerya woona ni olavula ni—ni sikina.

⁷⁰³ Kihaakhela ewarakha ekhumme wa yoowo, ahiiso oraame, nihiku nlo. Kookupali, wira Munna Cox aahirowa mpakha wa yoowo. Khwira, "Maitho awe oona ntoko ovihawa." Vekeekhai. Owo mutika, mitika sa eyoonelo sinimunnuwa sithikelaka okumi, moosuwela, ni sikhala voopuroni vaya. Mutakhalihwaahikumihiwa.

⁷⁰⁴ Mwahiyaru ephattu otthara mweettelo aya, yaahikhale etthu enikhottiherya ephattu, vano eni—enimwiira ele erinaaya wira. Nyuwo mwaitthukelaru ekhulula mmoononi mwanyu, mukhottiheryaaka ephome weetta, ntata nanyu vookiserya nnimookhwa. Vano, okhala wira, veephattu, enookhala saana nyuwo mwahiyaru mmansaya. Masi ethu emosa yoothikileha ephattu. Vano, nyuwo mwaahiwerye woona eyo, kхиivo enamuna ya meetiku ovaraa. Itthu piili paahi owo onwery'awe ovaraa-no muteko: ethu onweryaawe woona, ethu onweryaawe woona wii. Eyo t'itthu emosa tu owo onwery'awe ovaraa-no muteko: ethu owo onoon'awe ni ethu onoonaawe wii.

⁷⁰⁵ Owo aahiwerye woona, vano ehaana okhala ya erooho. Nto eri, ethu emosa paahi enwerya, ethu emosa enweryaneya okhumelela; ninoovekela, Kristu onookumiha mutakhalih, onoomoomola xetwani, nto eyo enipacerya okhala yoolikana, ovona. Onoovona, nto eyo ti yothene. "Mwa Nsina Naka awo anoowoomola axetwani." Eyo ekeekhai? Owo natiri wa ekereja. Owo natiri a owerya. Exeeni? Eyo, owo Mukhalelo Awe ni hiyo. Vano, exeeni ennikhottiherya hiyo okhala ooloka voosiis'ula, wira niireke itthu iye ntoko Owo siiraly'awe, okhala wira hiyo nlelo nri mukuwoni. Munnona? Masi hiyo nookhalana moonelo mmosa vo onnileela, "Oh, ayo." Munnona?

⁷⁰⁶ Nto nyuwo mwakupali ovonihwa wanyu, voohicala ele ettiyelelo enihimyaaya, t'ile Masu ahimmy'aya. Munnona? Ti yeeyo. Ti yeeyo. Ni ma—ma—Masu kweekwe anniwerya ethu p'itthu. Masu a Muluku Ahinimala!

⁷⁰⁷ Nkanweheni Saara, erukulu awe yookhwa, miyaakha miloko mithanu na mixexe, aakhala n'aiy'awe okhuma okathi waary'awe oophiyaka miyaakha muloko ni mithanu na mosa wala muloko ni mithanu na mili, ohirina aana; Abrahamu, emiya. Muluku khurukunuwa khwaavaha mwaana. Munnona? Okhala wira, awo yaahaamini. Awo yaahiihana itthu iye sahaakhanle, ntoko saakhanle. Mukele enamuna yeeyo voosiis'ula, mpatthani.

⁷⁰⁸ Nto ohiy'ula, hiyo ninwehererya...Nyuwo othene mwaanithotolaka, hiyo ninnithappa okhala ni nyuwo va voosiis'ula. Ni Muluku akhale ni nyuwo. Ni nyuwo mwakhala mpooma makaaripi, naamutteeliwa murima okhala ni nyuwo

ohiy'ula wa ele enihala ya muteko ola, wa Melikhiseteki. Vano nto mwaahikhale, nto mwakhalana ekereja anyu, murowe okereja wanyu. Nlo ti—nlo ti nri nipuro nanyu na muteko. Mwaairaka mpanpta wa ekereja, murowe weiwo. Ela etapernakulu yaamukhaani paahi vaavo hiyo ninthukuman'ahu va n'ukhalana opatthana mmosa ni mukhw'awe. Vano, Apwiya yooreeriheni.

⁷⁰⁹ Nto Munna Gertie onoonirumihela, *Meetiku Muulupale Vano Ori Vakhiviru*. Nto ookhala mutthu va wira ovekeleliwei? Nvenxe ntata nanyu, ale antthuna orwa muliinyani mwa mavekelo, wira muhelele waamini wanyu wa Kristu. Vaareera. Mwathataanaru epantte *ela* nno ya ekereja, xontte. Ni yasusiharu ekhatera vakhani paahi, munna, xontte, wira niwerye okhalana opuro vakhani vale ni niwerye waaviriha atthu. Murwe epantte *ela*.

⁷¹⁰ Nto ninrowa ovekela vano, niipaka. Ni kinrowa waavekela mahumu va, a khula muromolelo wala ekereja, voohicala wira t'evi, mwaaminiki vale ovoniha wa Muluku, mwaamweemela va ni miyo vaplataforma va, wira naavekelele aretta? Ninootteeliwa murima okhala ni nyuwo. Khula muromolelo, wala woohikhala muromolelo, wala ethu p'itthu mury'anyu, ninootteeliwa murima okhala ni nyuwo. Mwaanvira naanaano va, wira nivekele? Murwe mweemele ni miyo.

Munna Neville, nyuwo murwe ni makhura.



AHEPERI, EKAPIITULU YA NEETHANU NA MOSA ³ EMK57-0915M
(Hebrews, Chapter Six ³)

ÍTTHARANELO YA ELIIVURU YA AHEPERI

Mutthak'ola wa Munna William Marion Branham, opaceryawene olaleeriwe ni Enkelesi Ettiminku vaasiisu, mahiku yeettaka 15 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org